

RIGTERS

Outeur : **MoUse**
Aan : **Israeliete**
Rede : **Oor hulle**
geskiedenis.
Geskryf tussen : **992 BCE +/-**

Voorwoord.

Die boek Rigters begin met 'n oorsig oor die verowering van Kanaan en gee dan 'n beeld van die lewe in Kanaan toe daar nog nie 'n koning oor die Israeliete geregeer het nie. Die boek is op 'n besondere manier saamgestel: die volk word ontrou aan IEUE, die skynbeelde, word deur IEUE gestraf, roep tot Hom om hulp. Hy 'n leier om hulle te red van die nasies in wie se mag IEUE hulle oorgegee het. 'n Tydjie gaan dit goed totdat die volk weer ontrou aan IEUE word. In die laaste hooftekke word 'n beeld gegee van die wanorde wat daar op vroomdienstig en sedelike gebied geheers word.

Die Verowering van Kanaän.

- 1 En ná die dood van Iesou het die kinders van Israhel IEUE geraadpleeg en gesê: Wie van ons moet eerste optrek teen die Kanaäniete om teen hulle te veg?
- 2 En IEUE het gesê: Juda moet optrek. Kyk, Ek gee die land in sy hand.
- 3 Toe sê Juda aan sy broer Simeon: Trek saam met my op in my aandeel, dat ons die Kanaäniete kan beveg, dan sal ek ook met jou saam optrek in jou aandeel. En Simeon het saam met hom getrek;
- 4 en toe Juda optrek, het IEUE die Kanaäniete en Feresiete in hul hand gegee, sodat hulle tien duisend man van hulle by Besek verslaan het.
- 5 En hulle het Adóni-Besek aangetref in Besek en teen hom geveg, en die Kanaäniete en Feresiete verslaan.
- 6 En toe Adóni-Besek wegvlug, het hulle hom agternagejaag en hom gevang en sy duime en sy groottone afgekap.
- 7 Daarop sê Adóni-Besek: Sewentig konings met afgekapte duime en groottone het onder my tafel krummels opgetel: soos ek gedoen het, so het Aleim my vergeld. En hulle het hom na Jerusalem gebring, en daar het hy gesterwe.
- 8 En die kinders van Juda het teen Jerusalem geveg en dit ingeneem en dit met die skerpte van die swaard verslaan en die stad aan die brand gesteeke.

- 9 En daarna het die kinders van Juda afgetrek om te veg teen die Kanaäniete wat op die Gebergte en in die Suidland en in die Laeveld gewoon het.
- 10 Juda het dan teen die Kanaäniete uitgetrek, die inwoners van Hebron—maar die naam van Hebron was tevore Kirjat-Arba en hulle het Sesai en Ahiman en Talmai verslaan.
- 11 En daarvandaan het hy uitgetrek teen die inwoners van Debir—maar die naam van Debir was tevore Kirjat-Sefer.
- 12 En Kaleb het gesê: Hy wat Kirjat-Sefer verslaan en dit inneem, aan hom sal ek my dogter Agsa as vrou gee.
- 13 Daarop het Otniël, die seun van Kenas, die jonger broer van Kaleb, dit ingeneem; en hy het sy dogter Agsa aan hom as vrou gegee.
- 14 En toe sy aankom, het sy hom aangespoor om van haar vader 'n stuk grond te vra; en toe sy van die esel afklim, sê Kaleb vir haar: Wat wil jy hê?
- 15 En sy sê vir hom: Gee my tog 'n geskenk; omdat u my na 'n dor land versit het, moet u my waterfonteine gee. Toe gee Kaleb haar fonteine op die hoogte en fonteine in die laagte.
- 16 En die kinders van die Keniet, die swaer van MoUse, het saam met die kinders van Juda opgetrek uit die Palmstad na die woestyn van Juda wat in die suide van Arad lê; en hy het heengegaan en met die volk saamgewoon.
- 17 En Juda het saam met sy broer Simeon getrek, en hulle het die Kanaäniete verslaan wat in Sefat gewoon het en dit met die banvloek getref; daarom noem hulle die stad Horma.
- 18 En Juda het Gasa met sy grondgebied en Askelon met sy grondgebied en Ekron met sy grondgebied ingeneem.
- 19 En IEUE was met Juda, sodat hy die gebergte in besit geneem het; maar die bewoners van die laagte kon hy nie verdrywe nie, omdat hulle ysterwaens gehad het.
- 20 En hulle het Hebron aan Kaleb gegee, soos MoUse gespreek het; en hy het die drie seuns van Enak daaruit verdrywe.
- 21 En die kinders van Benjamin het die Jebusiete, die inwoners van Jerusalem, nie verdrywe nie, sodat die Jebusiete saam met die kinders van Benjamin in Jerusalem woon tot vandag toe.
- 22 En die huis van Ioseph, hulle het ook opgetrek na Bet-el, en IEUE was met hulle.
- 23 En toe die huis van Ioseph Bet-el laat bespied—maar die naam van die stad was tevore Lus—
- 24 sien die spioene 'n man uit die stad uitkom, en hulle sê vir hom: Wys ons tog 'n plek om in die stad in te kom, dan sal ons jou 'n guns bewys.
- 25 Hy wys hulle toe 'n plek om in die stad in te kom; en hulle het die stad verslaan met die skerpte van die swaard; maar die man en sy hele geslag het hulle laat gaan.
- 26 En die man het weggetrek na die land van die Hetiete, en hy het 'n stad gebou en dit Lus genoem; dit is sy naam tot vandag toe.
- 27 En Manasse het Bet-Sean met sy onderhorige plekke en Táanag met sy onderhorige plekke en die inwoners van Dor met sy onderhorige plekke en die inwoners van

- Jibleam met sy onderhorige plekke en die inwoners van Megiddo met sy onderhorige plekke nie verdrywe nie; en die Kanaäniete het verkies om in hierdie land te bly woon.
- 28 Maar toe Israhel sterk word, het hy die Kanaäniete dienspligtig gemaak; hy het hulle egter nie heeltemal verdrywe nie.
- 29 En Efraim het die Kanaäniete, die inwoners van Geser, nie verdrywe nie; sodat die Kanaäniete in sy midde in Geser bly woon het.
- 30 Sébulon het die inwoners van Kitron en die inwoners van Náhalol nie verdrywe nie; sodat die Kanaäniete in sy midde bly woon het; maar hulle het dienspligtig geword.
- 31 Aser het die inwoners van Akko en die inwoners van Sidon en Aglab en Afsib en Helba en Afik en Rehob nie verdrywe nie;
- 32 sodat die Aseriete bly woon het onder die Kanaäniete, die bevolking van die land, want hulle het hulle nie verdrywe nie.
- 33 Náftali het die inwoners van Bet-Semes en die inwoners van Bet-Anat nie verdrywe nie, sodat hy bly woon het onder die Kanaäniete, die bevolking van die land; maar die inwoners van Bet-Semes en Bet-Anat het aan hulle dienspligtig geword.
- 34 En die Amoriete het die kinders van Dan die gebergte in gedruk, want hulle het hul nie toegelaat om na die laagte af te kom nie;
- 35 sodat die Amoriete verkies het om te bly woon in Har-Heres, in Ajalon en in Sáälbim; maar die hand van die huis van Ioseph was swaar, sodat hulle dienspligtig geword het.
- 36 En die grens van die Amoriete was van Skerpioen-nek, van die rots af, en verder op..

Israhel se Ontrouheid.

- 2** Toe trek die Engel van IEUE van Gilgal op na Bogim en sê: Ek het julle uit Egipte laat optrek en julle gebring in die land wat Ek julle vaders met 'n eed beloof het, en gesê: Ek sal my verbond met julle in ewigheid nie verbreek nie;
- 2 maar julle mag geen verbond met die inwoners van hierdie land maak nie; hulle altare moet julle omgooi. Maar julle het nie na my stem geluister nie. Wat het julle nou gedoen?
- 3 So sê Ek dan ook: Ek sal hulle nie voor julle uit verdrywe nie, sodat hulle vyande vir julle sal wees, en hulle skynbeelde 'n strik vir julle.
- 4 En terwyl die Engel van IEUE met hierdie woorde al die kinders van Israhel toespreek, het die volk hulle stem verhef en geweën;
- 5 en hulle het dié plek Bogim genoem en daar aan IEUE geoffer.
- 6 Daarna het Iesou die volk laat gaan, en die kinders van Israhel het elkeen na sy erfdeel getrek om die land in besit te neem.
- 7 En die volk het IEUE gedien al die dae van Iesou en al die dae van die oudstes wat ná Iesou nog in die lewe was, en

al die groot werke van IEUE gesien het wat Hy vir Israhel gedoen het.

- 8 Maar Iesou, die seun van Nun, die kneg van IEUE, het gesterwe, honderd en tien jaar oud;
- 9 en hulle het hom begrawe op die gebied van sy erfdeel in Timnat-Heres, op die gebergte van Efraim, noord van die berg Gaäs.
- 10 En toe ook daardie hele geslag by hulle vaders versamel is, staan daar 'n ander geslag ná hulle op wat IEUE en ook die werk wat Hy vir Israhel gedoen het, nie geken het nie.

IEUE stuur leiers om sy volk te lei.

- 11 En die kinders van Israhel het gedoen wat verkeerd was in die oë van IEUE: hulle het die Baäls gedien
- 12 en IEUE, die Aleim van hulle vaders, verlaat wat hulle uit Egipteland uitgelei het, en hulle het agter ander skynbeelde aan geloop, van die skynbeelde van die volke wat rondom hulle was, en hulle daarvoor neergebuig en IEUE geterg.
- 13 Maar toe hulle IEUE verlaat en die Baäl en die Astartes dien,
- 14 het die toorn van IEUE teen Israhel ontvlam, en Hy het hulle oorgegee in die hand van rowers wat hulle beroof het; en Hy het hulle verkoop in die hand van hulle vyande rondom, sodat hulle nie meer kon standhou voor hulle vyande nie.
- 15 Waarheen hulle ook al uittrek, was die hand van IEUE teen hulle ten kwade, soos IEUE gespreek en soos IEUE vir hulle gesweer het. Maar wanneer hulle dan in groot benoudheid raak,
- 16 verwek IEUE rigters wat hulle verlos uit die hand van hulle berowers.
- 17 Na hulle rigters het hulle egter ook nie geluister nie, maar agter ander skynbeelde aan gehoereer en hulle daarvoor neergebuig; gou het hulle afgewyk van die weg wat hulle vaders bewandel het in gehoorsaamheid aan die gebooe van IEUE: so het hulle nie gedoen nie.
- 18 En wanneer IEUE vir hulle rigters verwek, was IEUE met die rigter om hulle te verlos uit die hand van hul vyande al die dae van die rigter, omdat IEUE medelyde gehad het vanweë hulle gekerm oor hulle verdrukkers en hulle verdringers.
- 19 Maar wanneer die rigter dood was, het hulle nog erger as hulle vaders gehandel deur agter ander skynbeelde aan te loop, om hulle te dien en hulle daarvoor neer te buig: hulle het niks laat vaar van hulle handeling en van hulle hardnekkige wandel nie.
- 20 Daarom het die toorn van IEUE teen Israhel ontvlam, en Hy het gesê: Omdat hierdie nasie my verbond wat Ek hulle vaders beveel het, oortree en na my stem nie luister nie,
- 21 sal Ek ook verder geeneen van die nasies wat Iesou by sy dood laat oorbly het, voor hulle uit verdrywe nie—
- 22 om Israhel deur hulle op die proef te stel, of hulle die weg van IEUE sal hou deur daarin te wandel soos hulle vaders dit gehou het, of nie.

- 23 Daarom het IEUE daardie nasies laat oorbly sonder om hulle dadelik te verdrywe, en hulle nie in die hand van Iesou gegee nie.

Ehud Verlos Israhel van Moab.

- 3** En dit is die nasies wat IEUE laat oorbly het om Israhel, almal wat al die oorloë van Kanaän nie geken het nie, deur hulle op die proef te stel—
- 2 net dat die geslagte van die kinders van Israhel dit kan weet—om hulle te leer oorlog voer, ten minste die wat daar vroeër nie van geweet het nie:
- 3 vyf vorste van die Filistyne en al die Kanaäniete en Sidoniërs en Hewiete wat in die gebergte Libanon gewoon het, van die berg Baäl-Hermon af tot by die ingang na Hamat.
- 4 Hulle was dan daar om deur hulle Israhel op die proef te stel; om te weet of hulle na die geboorte van IEUE wat Hy hulle vaders deur MoUse beveel het, sou luister.
- 5 So het die kinders van Israhel dan onder die Kanaäniete, Hetiete en Amoriete en Feresiete en Hewiete en Jebusiete gewoon,
- 6 en hül dogters vir hulle as vroue geneem en hulle eie dogters aan hül seuns gegee en hul skynbeelde gedien.

Otniël

- 7 En die kinders van Israhel het gedoen wat verkeerd was in die oë van IEUE en IEUE hulle Aleim vergeet en die Baäls en die heilige boomstamme gedien.
- 8 Daarop het die toorn van IEUE teen Israhel ontvlam, en Hy het hulle verkoop in die hand van Kusan Risatáim, die koning van Mesopotámië, en die kinders van Israhel het Kusan Risatáim agt jaar lank gedien.
- 9 Maar toe die kinders van Israhel IEUE aanroep, het IEUE 'n verlosser vir die kinders van Israhel verwek, wat hulle verlos het: Otniël, die seun van Kenas, die jonger broer van Kaleb.
- 10 En die Gees van IEUE het op hom gekom, en hy het Israhel gerig en uitgetrek om oorlog te voer; en IEUE het Kusan Risatáim, die koning van Aram, in sy hand gegee, sodat hy die oorhand oor Kusan Risatáim gekry het.
- 11 Toe kry die land rus veertig jaar lank. En Otniël, die seun van Kenas, het gesterwe.

Ehud

- 12 En die kinders van Israhel het weer gedoen wat verkeerd was in die oë van IEUE. Toe maak IEUE Eglon, die koning van Moab, sterk teen Israhel, omdat hulle gedoen het wat verkeerd was in die oë van IEUE;
- 13 en hy versamel by hom die kinders van Ammon en Amalek. Daarop het hy weggetrek en Israhel verslaan, en hulle het die Palmstad in besit geneem.
- 14 En die kinders van Israhel het Eglon, die koning van Moab, agttien jaar lank gedien.
- 15 Maar toe die kinders van Israhel IEUE aanroep, het IEUE vir hulle as verlosser verwek: Ehud, die seun van Gera, die Benjaminië, 'n man wat links was. Deur hom stuur

toe die kinders van Israhel die belasting aan Eglon, die koning van Moab.

- 16 En Ehud het vir hom 'n swaard gemaak, aan twee kante skerp, een el lank, en dit onder sy klere aan sy regterheup vasgegorde;
- 17 en hy het die belasting aan Eglon, die koning van Moab, gebring; en Eglon was 'n baie vet man.
- 18 En toe hy die belasting volledig afgelewer het, bring hy die mense wat die belasting gedra het, weg;
- 19 maar hy self het omgedraai by die gesnede beelde wat by Gilgal was, en gesê: Ek het 'n geheime opdrag aan u, o koning! Dié sê toe: Stil! En almal wat by hom staan, het van hom af weggegaan buitentoe.
- 20 En toe Ehud by hom inkom, terwyl hy in die koel bo-kamer sit wat vir hom alleen was, sê Ehud: Ek het 'n woord van Aleim aan u! En toe hy van sy stoel af opstaan,
- 21 steek Ehud sy linkerhand uit en gryp die swaard van sy regterheup af en steek dit in sy buik,
- 22 sodat selfs die hef agter die lem ingedring het en die vet, want hy het die swaard nie uit sy buik uitgetrek nie, om die lem toegesluit en by die wond uitgepui het.
- 23 Toe gaan Ehud uit op die galery, maar hy het die deure van die bo-kamer agter hom gesluit en gegrendel.
- 24 Net toe hy uitgegaan het, kom sy dienaars; en toe hulle sien en kyk: die deure van die bo-kamer was gegrendel, sê hulle: Hy is seker besig om sy voete te bedek in die koel kamer.
- 25 En hulle het gewag totdat hulle verleë was; maar—hy het die deure van die bo-kamer nie oopgemaak nie! En toe hulle die sleutel gaan haal en oopsluit, lê hulle heer daar dood op die grond!
- 26 Maar terwyl hulle nog talm, het Ehud ontvlug en die gesnede beelde verbygegaan en na Seïra ontsnap.
- 27 En toe hy aankom, blaas hy op die ramshoring op die gebergte van Efraim, en die kinders van Israhel het saam met hom van die gebergte afgetrek, en hy voor hulle uit.
- 28 Toe sê hy vir hulle: Volg my, want IEUE gee julle vyande, die Moabiete, in julle hand; en hulle het agter hom aan afgetrek en die Moabiete van die driewe van die Jordaan afgesny en niemand toegelaat om deur te gaan nie.
- 29 En hulle het in dié tyd van Moab omtrent tien duisend man verslaan, almal goed geboude en almal dapper manne, en niemand het vrygekom nie.
- 30 So moes Moab dan dié dag buig onder die hand van Israhel; en die land het tagtig jaar lank gerus.

Samgar

- 31 Toe kom ná hom Samgar, die seun van Anat, wat van die Filistyne ses honderd man met 'n osdrywerstok verslaan het; en ook hy het Israhel verlos.

Debora en Barak Verlos Israhel.

- 4** Maar ná die dood van Ehud het die kinders van Israhel weer gedoen wat verkeerd was in die oë van IEUE.

- 2 Daarom het IEUE hulle verkoop in die hand van Jabin, die koning van Kanaän, wat in Hasor geregeer het; en sy leërowerste was Sísëra, ‘n inwoner van Haróset van die heidene.
- 3 En die kinders van Israhel het IEUE aangeroep; want hy het nege honderd ysterwaens gehad en die kinders van Israhel twintig jaar lank swaar verdruk.
- 4 En Debóra, ‘n profetes, die vrou van Láppidot, het in dié tyd Israhel gerig;
- 5 en sy het gesit onder die palm van Debóra, tussen Rama en Bet-el, op die geberge van Efraim; en die kinders van Israhel het na haar opgegaan vir regspraak.
- 6 Toe laat sy Barak, die seun van Abinóam, uit Kedes in Náftali, roep en sê vir hom: Het IEUE, die Aleim van Israhel, nie bevel gegee nie: Gaan, trek na die berg Tabor, en neem tien duisend man van die kinders van Náftali en van die kinders van Sébulon met jou saam?
- 7 dan sal Ek Sísëra, die leërowerste van Jabin, met sy strydwaens en sy menigte na jou, na die spruit Kison trek, en Ek sal hom in jou hand gee.
- 8 Maar Barak sê vir haar: As u met my saamtrek, sal ek gaan; maar as u nie met my saamtrek nie, gaan ek nie.
- 9 Toe sê sy: Ek sal sekerlik met jou saamtrek, maar die eer sal nie jouë wees op die pad wat jy sal gaan nie; want IEUE sal Sísëra in die hand van ‘n vrou verkoop; en Debóra het opgestaan en saam met Barak na Kedes getrek.
- 10 Daarop het Barak Sébulon en Náftali bymekaargeroep na Kedes toe, en tien duisend man het op sy voetspore opgetrek, en Debóra het saam met hom opgetrek.
- 11 En Heber, die Keniet, het hom afgeskei van Kain, van die kinders van Hobab, die swaer van MoUse, en het sy tente opgeslaan tot by die terpentynboom by Saánáim, naby Kedes.
- 12 En toe hulle aan Sísëra berig bring dat Barak, die seun van Abinóam, na die berg Tabor opgetrek het,
- 13 het Sísëra al sy strydwaens, nege honderd ysterwaens, en al die manskappe wat by hom was, uit Haróset van die heidene na die spruit Kison bymekaargeroep.
- 14 Daarop sê Debóra vir Barak: Maak jou klaar, want dit is die dag waarop IEUE Sísëra in jou hand gee. Trek IEUE nie voor jou uit nie? Toe trek Barak van die berg Tabor af, en tien duisend man agter hom aan.
- 15 En IEUE het Sísëra met al die waens en die hele leër deur die skerppte van die swaard in verwarring gebring voor Barak uit, en Sísëra het van sy wa afgeklim en te voet gevlug.
- 16 Maar Barak het die waens en die leër agternagejaag tot by Haróset van die heidene, en die hele leër van Sísëra het deur die skerppte van die swaard geval; daar het selfs nie een oorgebly nie.
- 17 Toe vlug Sísëra te voet na die tent van Jael, die vrou van Heber, die Keniet; want daar was vrede tussen Jabin, die koning van Hasor, en die huis van Heber, die Keniet.
- 18 En Jael het uitgegaan Sísëra tegemoet en vir hom gesê: Draai uit, my heer, draai uit na my! Moenie bang wees

nie! En hy het na haar uitgedraai, na die tent, en sy het hom met ‘n kombers toegemaak.

- 19 Daarop sê hy vir haar: Gee my tog ‘n bietjie water om te drink, want ek het dors; sy maak toe die melksak oop en laat hom daaruit drink en maak hom weer toe.
- 20 En hy sê vir haar: Gaan staan by die tentdeur, en as iemand kom en jou vra en sê: Is hier iemand? antwoord dan: Nee.
- 21 Toe neem Jael, die vrou van Heber, ‘n tentpen en vat die hamer in haar hand en gaan stilletjies na hom en dryf die pen terwyl hy vas aan die slaap was dwarsdeur die slaap van sy hoof, sodat dit in die grond indring. So het hy dan bewusteloos geword en gesterwe.
- 22 En kyk, terwyl Barak Sísëra agtervolg, gaan Jael uit hom tegemoet en sê vir hom: Kom, en ek sal u die man wys wat u soek; en toe hy by haar inkom, lê Sísëra daar dood, met die pen deur die slaap van sy hoof!
- 23 So het Aleim dan op dié dag Jabin, die koning van Kanaän, voor die kinders van Israhel onderwerp.
- 24 En die hand van die kinders van Israhel het al swaarder gaan druk op Jabin, die koning van Kanaän, totdat hulle Jabin, die koning van Kanaän, uitgeroei het.

Oorwinningslied van Debora en Barak.

- 5 Op dié dag het Debóra en Barak, die seun van Abinóam, gesing en gesê:
- 2 Omdat aanvoerders aangevoer het in Israhel, omdat die volk hom gewillig getoon het—prys IEUE!
- 3 Hoor, o konings! Luister, o vorste! Ek, tot eer van IEUE wil ek sing, tot eer van IEUE, die Aleim van Israhel, wil ek psalmsing.
- 4 IEUE, toe U uitgetrek het uit Seïr, toe U voortgestap het uit die veld van Edom, het die aarde gebeef, ook het die hemel gedrup, ook het die wolke water gedrup.
- 5 Berge het gewankel voor die aangesig van IEUE uit, hierdie Sinai voor die aangesig van IEUE, die Aleim van Israhel.
- 6 In die dae van Samgar, die seun van Anat, in die dae van Jael, was die paaie verlate, en die reisigers het langs sypaaie gegaan.
- 7 Leiers het ontbreek in Israhel, ontbreek; totdat ek, Debóra, opgestaan het, ek, ‘n moeder in Israhel, opgestaan het.
- 8 Kies hulle nuwe skynbeelde, dan is daar oorlog in die poorte; was daar skild of spies te sien onder veertig duisend in Israhel?
- 9 My hart is vir die aanvoerders van Israhel wat hulle gewillig betoon het onder die volk—prys IEUE!
- 10 Julle wat op wit eselinne ry, wat op tapyte sit, wandelaars langs die paaie, dink na!
- 11 Vanweë die stem van die boogskutters tussen die drinkplekke, besing hulle daar die regverdige dade van IEUE, die regverdige dade van sy leiding in Israhel. Toe het die volk van IEUE afgetrek na die poorte toe.
- 12 Word wakker, word wakker, Debóra! Word wakker, word wakker, hef ‘n lied aan! Staam op, Barak! en voer jou gevangesenes weg, seun van Abinóam!

- 13 Toe het die oorblyfsel van die vername manne van die volk afgetrek, toe het IEUE vir my afgetrek onder die helde.
- 14 Uit Efraim, die wat hulle wortel in Amalek het; Benjamin, agter jou aan onder jou manskappe; uit Magir trek die aanvoerders af, en uit Sébulon die wat met die werwerstaf uittrek;
- 15 en vorste in Issaskar met Debóra saam; en Issaskar soos Barak: in die dal storm hulle op sy voetspore. In die afdelings van Ruben was die voornemens van die hart groot.
- 16 Waarom het jy tussen die veekrale bly sit en luister na die fluitspel by die troppe vee? In die afdelings van Ruben was die voornemens van die hart groot.
- 17 Gilead het rustig oorkant die Jordaan gebly; en Dan, waarom vertoef hy by die skepe? Aser het bly sit aan die seekus en aan sy baaie rustig gebly.
- 18 Sébulon is 'n volk wat sy siel gering ag tot die dood toe; ook Náftali op die hoogvlaktes.
- 19 Konings het gekom, geveg; toe het die konings van Kanaän geveg by Táanag, by die waters van Megiddo—geen stuk silwer het hulle geneem nie.
- 20 Uit die hemel het die sterre geveg, uit hulle bane het hulle teen Sísera geveg;
- 21 die spruit Kison het hulle afgedrywe, die spruit van ontmoeting, die spruit Kison! Tree op, my siel, met mag!
- 22 Toe het die perdepote geklap van die gejaag, die gejaag van hulle geweldiges.
- 23 Vloek Meros, sê die Engel van IEUE; ja, vervloek sy inwoners, omdat hulle IEUE nie tot hulp gekom het nie, IEUE tot hulp onder die helde.
- 24 Mag bo die vroue geseënd wees Jael, die vrou van Heber, die Keniet; geseënd wees bo die vroue in die tent!
- 25 Water het hy gevra, melk het sy gegee, in 'n sierlike skottel het sy dikmelk gebring.
- 26 Haar hand steek sy uit na die tentpen en haar regterhand na die werksman se hamer; en sy hamer Sísera, verpletter sy kop en verbrysel en deurboor die slaap van sy hoof.
- 27 Tussen haar voete sak hy inmekaar, val, lê daar! Tussen haar voete sak hy inmekaar, val; waar hy inmeekaarsak, daar lê hy—morsdood.
- 28 Deur die venster kyk die moeder van Sísera uit, en sy roep deur die venstertralie: Waarom vertoef sy wa om te kom? Waarom versuim die passe van sy wa-span?
- 29 Die skranderste van haar vorstinne antwoord haar, ja, sy self antwoord op haar woorde:
- 30 Hulle het seker buit gevind en verdeel dit: een slavin, twee slavinne vir elke man; 'n buit van bont klere vir Sísera, 'n buit van bont klere, veelkleurige; 'n bont doek, twee veelkleuriges as buit vir my hals.
- 31 So moet al u vyande, IEUE, omkom! Maar die wat Hom liefhet, is soos die opgang van die son in sy krag. En die land het veertig jaar lank gerus.

Gideon word tot Diens geroep.

- 6 Maar toe die kinders van Israhel gedoen het wat verkeerd was in die oë van IEUE, het IEUE hulle oorgegee in die hand van die Midianiete, sewe jaar lank.
- 2 En die Midianiete het die oorhand oor Israhel gekry; vanweë die Midianiete het die kinders van Israhel vir hulle die slote gemaak wat op die berge is, en die gate en die bergvestings.
- 3 Want as Israhel gesaai het, dan trek die Midianiete en Amalekiete en die kinders van die Ooste uit, en trek teen hulle op:
- 4 slaan laers teen hulle op en verwoes die opbrings van die land in die rigting na Gasa, en hulle laat geen lewensmiddele, geen skaap of bees of esel in Israhel oorbly nie.
- 5 Want hulle het met hul vee en hul tente opgetrek en gekom soos sprinkane in menigte, terwyl hulle en hul kamele ontelbaar was; so het hulle dan die land ingekom om dit te verwoes.
- 6 En Israhel het deur die Midianiete baie arm geword, maar die kinders van Israhel het IEUE aangeroep.
- 7 En toe die kinders van Israhel IEUE aanroep vanweë die Midianiete,
- 8 het IEUE 'n profeet na die kinders van Israhel gestuur, en dié het vir hulle gesê: So spreek IEUE, die Aleim van Israhel: Ek self het julle laat optrek uit Egipte en julle uit die slawehuis uitgelei
- 9 en julle gered uit die hand van die Egiptenaars en uit die hand van al julle verdrukkers en hulle voor julle uit verdrywe en hulle land aan julle gegee.
- 10 En Ek het aan julle gesê: Ek is IEUE julle Aleim; julle mag die skynbeelde van die Amoriete in wie se land julle woon, nie vrees nie. Maar julle het nie na my stem geluister nie.
- 11 Toe het die Engel van IEUE gekom en gaan sit onder die terpentynboom wat by Ofra staan, wat aan Joas, die Abiësriet, behoort het, terwyl sy seun Gideon juis koring uitslaan in die parskuip om dit te beveilig teen die Midianiete.
- 12 En die Engel van IEUE het aan hom verskyn en vir hom gesê: Die IEUE is met jou, dapper held!
- 13 Toe vra Gideon Hom: Ag, my heer, as IEUE met ons is, waarom het al hierdie dinge ons dan oorgekom? En waar is al sy wonders waar ons vaders ons van vertel het, deur te sê: Het IEUE ons nie uit Egipte laat optrek nie? Maar nou het IEUE ons verwerp en ons oorgegee in die hand van die Midianiete.
- 14 Toe draai IEUE na hom toe en sê: Gaan in hierdie krag van jou en verlos Israhel uit die hand van die Midianiete. Is dit nie Ek wat jou stuur nie?
- 15 Maar hy vra Hom: Ag, Ioseph, waarmee sou ek Israhel verlos? Kyk, my geslag is die swakste in Manasse, en ek self die geringste in my familie.
- 16 Toe sê IEUE vir hom: Ek sal met jou wees, sodat jy die Midianiete soos een man sal verslaan.
- 17 En hy antwoord Hom: As ek dan guns in u oë gevind het, doen vir my 'n teken, dat U dit is wat met my spreek.

- 18 Verwyder U tog nie hiervandaan voordat ek by U kom en my gawe uitbring en voor U neersit nie. Hy sê toe: Ek sal bly totdat jy terugkom.
- 19 Toe het Gideon ingegaan en 'n bokkie berei, en van 'n efa meel ongesuurde koeke; die vleis het hy in 'n mandjie gesit en die sous in 'n pot gegooi; en hy het dit na Hom uitbring onder die terpentynboom en dit naby neergesit.
- 20 Maar die Engel van Aleim het vir hom gesê: Neem die vleis en die ongesuurde koeke, en sit dit op hierdie rots neer en gooi die sous daaroor uit. En hy het so gedoen.
- 21 Daarop steek die Engel van IEUE die punt van die staf wat in sy hand was, uit en raak die vleis en die ongesuurde koeke aan; toe gaan daar vuur op uit die rots en verteer die vleis en die ongesuurde koeke. Intussen het die Engel van IEUE verdwyn uit sy oë.
- 22 Toe Gideon bemerk dat dit die Engel van IEUE was, sê Gideon: Ag, Ioseph IEUE! want ek het die Engel van IEUE gesien van aangesig tot aangesig!
- 23 Maar IEUE sê vir hom: Vrede vir jou! Vrees nie! Jy sal nie sterwe nie.
- 24 Toe bou Gideon daar 'n altaar vir IEUE en noem dit: Die IEUE is vrede! Dit staan vandag nog daar by Ofra van die Abiësriete.
- 25 En in dieselfde nag het IEUE vir hom gesê: Neem die bul van jou vader, naamlik die tweede bul van sewe jaar, en breek die altaar van Baäl af wat aan jou vader behoort, en kap die heilige boomstam af wat daar langsaan staan.
- 26 En bou vir IEUE jou Aleim 'n altaar op die top van hierdie vesting deur opstapeling, en neem die tweede bul en bring dit as 'n brandoffer met die hout van die heilige boomstam wat jy moet afkap.
- 27 Toe het Gideon tien man van sy dienaars geneem en gedoen soos IEUE aan hom gesê het; maar omdat hy te bang was vir sy familie en vir die manne van die stad, om dit oordag te doen, het hy dit in die nag gedoen.
- 28 En toe die manne van die stad die môre vroeg opstaan, lê die altaar van Baäl daar omgegooi en die heilige boomstam wat daar langsaan gestaan het, afgekap en die tweede bul geoffer op die altaar wat daar gebou was!
- 29 Toe sê hulle, die een vir die ander: Wie het hierdie ding gedoen? En onderwyl hulle ondersoek en uitvra, sê hulle: Gideon, die seun van Joas, het hierdie ding gedoen!
- 30 Toe sê die manne van die stad vir Joas: Bring jou seun uit, hy moet sterwe, omdat hy die altaar van Baäl omgegooi het, en omdat hy die heilige boomstam wat daar langsaan gestaan het, afgekap het.
- 31 Maar Joas sê vir almal wat by hom staan: Wil julle vir Baäl veg? Of wil julle hom help? Die wat vir hom veg, sal vanmôre nog gedood word. As hy 'n god is, laat hy vir homself veg, omdat hy sy altaar omgegooi het.
- 32 Daarom het hy hom op dié dag Jerúbbaäl genoem en gesê: Laat Baäl teen hom veg, omdat hy sy altaar omgegooi het.
- 33 Toe het al die Midianiete en Amalekiete en die kinders van die Ooste aanmeekargesluit en deurgetrek en in die laagte van Jisreël laer opgeslaan.

- 34 En die Gees van IEUE het Gideon vervul; en hy het op die ramshoring geblaas, en die Abiësriete is agter hom aan opgeroep.
- 35 Ook het hy boodskappers gestuur in die hele Manasse, en dié is ook agter hom aan opgeroep; ook het hy boodskappers gestuur in Aser en in Sébulon en in Náftali, en hulle het opgetrek, hulle tegemoet.
- 36 Toe het Gideon met Aleim gespreek: As U werklik deur my hand Israhel wil verlos soos U gespreek het—
- 37 ek sal die wolvlies op die dorsvloer neêrlê: as daar net op die vlies dou is, terwyl die grond oral droog is, dan sal ek weet dat U deur my hand Israhel wil verlos soos U gespreek het.
- 38 En dit was so: toe hy die volgende môre vroeg opstaan, het hy die vlies uitgewring en die dou uit die vlies uitgedruk, 'n kom vol water.
- 39 Toe het Gideon met Aleim gespreek: Laat u toorn nie teen my ontvlam nie, en laat my net hierdie keer mag spreek; laat my tog net hierdie keer met die vlies 'n proef neem: laat dit op die vlies alleen droog wees terwyl daar op die grond oral dou is.
- 40 En IEUE het daardie nag so gedoen: op die vlies alleen was dit droog, maar oral op die grond was daar dou.

Die Drie honderd Man van Gideon.

- 7** Daarna het Jerúbbaäl, dit is Gideon, en al die manskappe wat by hom was, vroeg klaargemaak, en hulle het laer opgeslaan by die fontein Harod, terwyl die laer van die Midianiete ten noorde van hom was, van die heuwel More af in die dal.
- 2 Toe sê IEUE vir Gideon: Die manskappe by jou is te veel vir My om die Midianiete in hulle hand te gee; anders kan Israhel hom teen My beroem deur te sê: My eie hand het my verlos.
- 3 Roep dan nou tog uit voor die ore van die manskappe en sê: Die wat bang is en bewe, kan teruggaan en wegdraai van die gebergte van Gilead af. Toe het daar van die manskappe twee en twintig duisend omgedraai, en tien duisend het oorgebly.
- 4 Daarop sê IEUE vir Gideon: Die manskappe is nog te veel; bring hulle af na die water, dan sal Ek hulle daar vir jou uitsoek; en van wie Ek aan jou sê: Hierdie een mag met jou saamgaan—dié mag met jou saamgaan; maar elkeen van wie Ek aan jou sê: Hierdie een mag nie met jou saamgaan nie—dié mag nie gaan nie.
- 5 Hy bring toe die manskappe af na die water; en IEUE sê vir Gideon: Elkeen wat met sy tong die water oplek soos 'n hond lek, moet jy eenkant laat staan; en elkeen wat op sy knieë vooroor buig om te drink, anderkant.
- 6 En die aantal van die wat gelek het met hul hand na hul mond toe, was drie honderd man; en al die ander manskappe het op hulle knieë vooroor gebuig om water te drink.
- 7 Toe sê IEUE vir Gideon: Deur die drie honderd man wat gelek het, sal Ek julle verlos en die Midianiete in jou hand gee; maar al die ander manskappe kan elkeen na sy woonplek gaan.

- 8 Daarop neem hulle die padkos van die manskappe en hulle ramshorings in hul hand; en hy het al die manskappe van Israhel laat gaan, elkeen na sy tente toe; maar die drie honderd man het hy agtergehou, terwyl die laer van die Midianiete onderkant hom in die laagte was.
- 9 En daardie nag het IEUE vir hom gesê: Staen op, gaan af in die laer, want Ek gee dit in jou hand.
- 10 En as jy bang is om af te gaan, gaan jy dan saam met jou dienaar Pura af na die laer toe
- 11 en luister wat hulle praat; en daarna sal jou hande sterk word, en jy sal in die laer aftrek. Hy gaan toe af saam met sy dienaar Pura tot by die buitenste lyn van die gewapendes wat in die laer was.
- 12 En die Midianiete en Amalekiete en al die kinders van die Ooste het in die laagte gelê soos sprinkane in menigte, en hulle kamele was ontelbaar soos die sand aan die seestrand in menigte.
- 13 En toe Gideon aankom, vertel 'n man aan 'n ander juis 'n droom en sê: Kyk, ek het 'n droom gehad: Daar rol 'n hard gebakte garsbrood in die laer van die Midianiete en kom tot by die tent en slaan dit dat dit omval en keer dit onderstebo, en toe lê die tent daar!
- 14 En die ander een het geantwoord en gesê: Dit is niks anders nie as die swaard van Gideon, die seun van Joas, die Israeliet; Aleim het die Midianiete en die hele laer in sy hand gegee.
- 15 Toe Gideon dan die verhaal van die droom en sy uitlegging hoor, het hy aanbid; en hy het teruggekeer na die laer van Israhel en gesê: Maak klaar, want IEUE gee die laer van die Midianiete in julle hand.
- 16 En hy het die drie honderd man verdeel in drie dele en aan hulle almal ramshorings en lê kruike, met fakkels binne-in die kruike, in die hand gegee
- 17 en aan hulle gesê: Kyk na my en maak net so; en kyk, as ek by die buitenste lyn van die laer kom, dan moet julle maak net soos ek maak.
- 18 En as ek en almal wat by my is, op die ramshoring blaas, moet julle ook op die ramshorings blaas rondom die hele laer, en julle moet sê: Vir IEUE en vir Gideon!
- 19 Toe kom Gideon en die honderd man wat by hom was, by die buitenste lyn van die laer, met die begin van die middelste nagwaak toe hulle skaars die wagte uitgesit het, en hulle blaas op die ramshorings en slaan die kruike stukkend wat hulle in hul hand gehad het.
- 20 Toe blaas die drie dele op die ramshorings en breek die kruike en hou met hulle linkerhand die fakkels en met hulle regterhand die ramshorings om te blaas, terwyl hulle uitroep: Die swaard van IEUE en van Gideon!
- 21 En hulle het bly staan elkeen op sy plek, rondom die laer. Daarop hardloop die hele laer, en hulle skreeu en vlug.
- 22 En toe die drie honderd op die ramshorings blaas, het IEUE die swaard van die een teen die ander gerig, ja, in die hele laer; en die laer het gevlug na Bet-Sitta, na Seréda toe, tot by die oewer van Abel-Mehóla by Tabbat.
- 23 En die manskappe van Israhel uit Náftali en uit Aser en uit die hele Manasse is opgeroep, en hulle het die Midianiete agternagejaag.

- 24 Ook het Gideon boodskappers gestuur in die hele gebergte van Efraim om te sê: Trek af die Midianiete tegemoet, en sny hulle van die waters af tot by Bet-Bara en die Jordaen. So het dan al die manskappe van Efraim bymekaargekom en die waters beset tot by Bet-Bara en die Jordaen.
- 25 En hulle het twee vorste van die Midianiete gevang, Oreb en Seëb; en Oreb het hulle gedood by die rots Oreb, en Seëb gedood by die parskuip Seëb, en hulle het die Midianiete agtervolg; en die hoof van Oreb en van Seëb het hulle na Gideon gebring, oorkant die Jordaen.

Gideon verdryf die Midian Koning.

- 8 Toe sê die manskappe van Efraim vir hom: Wat is dit wat u ons aangedoen het, dat u ons nie geroep het toe u weggetrek het om teen die Midianiete te veg nie? En hulle het heftig met hom getwis.
- 2 Maar hy sê vir hulle: Wat het ek nou gedoen in vergelyking met julle? Is die na-oes van Efraim nie beter as die wynoes van Abiëser nie?
- 3 Aleim het die vorste van Midian, Oreb en Seëb, in julle hand gegee, maar wat kon ek doen in vergelyking met julle? Toe bedaar hulle opgewondenheid teenoor hom nadat hy hierdie woord gespreek het.
- 4 En Gideon het gekom by die Jordaen, en hy en die drie honderd man wat by hom was, het oorgetrek, moeg en besig om te agtervolg.
- 5 En hy sê aan die manne van Sukkot: Gee tog broodjies vir die manskappe wat op my voetspore volg, want hulle is moeg, en ek is besig om Seba en Sálmuná, die konings van die Midianiete, agterna te jaag.
- 6 Maar die vorste van Sukkot vra: Is die handpalm van Seba en van Sálmuná nou al in u hand, dat ons aan u leer brood moet gee?
- 7 Toe sê Gideon: Daarom, as IEUE Seba en Sálmuná in my hand gee, sal ek julle vlees met woestyndorings en distels dors.
- 8 En daarvandaan het hy opgetrek na Pnuel en met hulle net so gespreek; maar die manne van Pnuel het hom geantwoord net soos die manne van Sukkot geantwoord het.
- 9 Daarop spreek hy ook met die mense van Pnuel en sê: As ek met vrede terugkom, sal ek hierdie toring omgooi.
- 10 Seba en Sálmuná was toe in Karkor, en hul leer by hulle, omtrent vyftien duisend, al wat oor was uit die hele leer van die kinders van die Ooste; maar die gesneuweldes was honderd en twintig duisend man wat die swaard kon uittrek.
- 11 En Gideon het opgetrek met die pad van die tentbewoners, ten ooste van Nobag en Jógbeha, en hy het die leer verslaan terwyl die leer gerus was.
- 12 En Seba en Sálmuná het gevlug, maar hy het hulle agternagejaag en die twee konings van Midian, Seba en Sálmuná, gevang nadat hy die hele leer uiteengejaag het.
- 13 En toe Gideon, die seun van Joas, terugkom uit die geveg, van die nek Heres af,

- 14 vang hy 'n seun van die mense van Sukkot en vra hom uit; en dié het vir hom die vorste van Sukkot en sy oudstes opgeskrywe, sewe en sewentig man.
- 15 En toe hy by die mense van Sukkot kom, sê hy: Hier is Seba en Sálmunā oor wie julle my gesmaad het deur te sê: Is die handpalm van Seba en van Sálmunā nou al in u hand, dat ons aan u vermoeide manskappe brood moet gee?
- 16 Daarop neem hy die oudstes van die stad saam met die woestynдорings en die distels, en hy het die manne van Sukkot daarmee 'n les geleer.
- 17 En die toring van Pnuel het hy omgegooi en die manne van die stad gedood.
- 18 En hy het Seba en Sálmunā gevra: Wat vir manne was dit wat julle by Tabor gedood het? En hulle antwoord: Soos u, so was hulle: elkeen van gestalte koninklike seuns.
- 19 Daarop sê hy: Dit was my broers, seuns van my moeder. So waar as IEUE leef, as julle hulle laat leef het, sou ek julle nie doodmaak nie.
- 20 En hy sê aan Jeter, sy eersgeborene: Staan op, maak hulle dood! Maar die seun het sy swaard nie uitgetrek nie, omdat hy bang was; want hy was nog 'n seun.
- 21 Toe sê Seba en Sálmunā: Staan u self op en val op ons aan, want soos die man is, is sy krag. Gideon het toe opgestaan en Seba en Sálmunā gedood, en die maantjies wat aan die nekke van hulle kamele was, het hy geneem.
- 22 Daarop sê die manne van Israhel vir Gideon: Heers oor ons, u sowel as u seun en u kleinseun, want u het ons verlos uit die hand van die Midianiete.
- 23 Maar Gideon antwoord hulle: Ek wil nie oor julle heers nie, en ook my seun mag nie oor julle heers nie: IEUE sal oor julle heers.
- 24 Verder het Gideon vir hulle gesê: Ek wil aan julle 'n versoek doen: Gee nou elkeen vir my die ring uit sy buit! Want hulle het goue ringe gedra, omdat hulle Ismaeliete was.
- 25 Toe sê hulle: Ons wil dit graag gee; en hulle het 'n mantel uitgesprei en elkeen 'n ring van sy buit daarop gegooi.
- 26 En die gewig van die goue ringe wat hy gevra het, was sewentien honderd sikkels goud, behalwe die maantjies en die oorversiersels en purper klere wat die konings van Midian gedra het, en behalwe die kettings wat aan die nekke van hulle kamele was.
- 27 En Gideon het daar 'n skouerkleed van gemaak en dit in sy stad, in Ofra, opgestel; en die hele Israhel het dit daar agternagehoereer, en dit het vir Gideon en sy huis 'n strik geword.
- 28 So moes die Midianiete dan buig voor die kinders van Israhel, en hulle het hul hoof nie meer opgetel nie; en die land het in Gideon se dae veertig jaar lank gerus.
- 29 En Jerúbbaäl, die seun van Joas, het in sy huis gaan woon.
- 30 En Gideon het sewentig seuns gehad wat uit sy lende voortgekom het, want hy het baie vroue gehad.
- 31 En sy byvrou wat in Sigem was, het ook vir hom 'n seun gebaar, en hy het hom die naam Abimelech gegee.

- 32 En Gideon, die seun van Joas, het gesterf in goeie ouderdom en is begrawe in die graf van sy vader Joas, in Ofra van die Abiësrïete.
- 33 Maar net toe Gideon dood was, het die kinders van Israhel weer die Baäls agternagehoereer en van Baäl-Berit vir hulle 'n god gemaak.
- 34 En die kinders van Israhel het nie gedink aan IEUE hulle Aleim wat hulle uit die hand van al hul vyande rondom gered het nie.
- 35 En hulle het geen guns bewys aan die huis van Jerúbbaäl, dit is Gideon, vir al die goed wat hy aan Israhel gedoen het nie.

Abimelech.

- 9 En Abimelech, die seun van Jerúbbaäl, het heengegaan na Sigem, na die broers van sy moeder, en hy het met hulle en met die hele geslag van sy moeder se familie gespreek en gesê:
 - 2 Spreek tog voor die ore van al die burgers van Sigem: Wat is vir julle beter—dat sewentig man, almal seuns van Jerúbbaäl, oor julle heers, of dat een man oor julle heers? En dink daaraan dat ek julle gebeente en julle vlees is.
 - 3 Toe die broers van sy moeder al hierdie woorde voor die ore van al die burgers van Sigem oor hom spreek, het hulle hart Abimelech gevolg; want hulle het gesê: Hy is ons broer.
 - 4 Hulle het hom toe sewentig sikkels silwer uit die huis van Baäl-Berit gegee, en daarmee het Abimelech ydele en ligsinnige manne gehuur, en hulle het hom gevolg.
 - 5 En hy het in die huis van sy vader gegaan, in Ofra, en sy broers, die seuns van Jerúbbaäl, sewentig man, op een klip vermoor; maar Jotam, die jongste seun van Jerúbbaäl, het oorgebly, want hy het weggekruipt.
 - 6 Daarop het al die burgers van Sigem en die hele huis Millo bymekaargekom en Abimelech gaan koning maak by die terpentynboom van die gedenkteken wat by Sigem is.
 - 7 Toe hulle dit aan Jotam meedeel, het hy op die top van die berg Gerísim gaan staan en sy stem verhef en uitgeroep en aan hulle gesê: Luister na my, burgers van Sigem, sodat Aleim na julle kan luister.
 - 8 Eendag het die bome gegaan om 'n koning oor hulle te salf en aan die olyfboom gesê: Wees koning oor ons!
 - 9 Maar die olyfboom het vir hulle gesê: Sou ek my vettigheid opgee wat Aleim en die mense in my prys, en oor die bome gaan swewe?
 - 10 Toe sê die bome vir die vyeboom: Kom jy, wees koning oor ons.
 - 11 Maar die vyeboom het vir hulle gesê: Sou ek my soetigheid en my goeie vrugte opgee en oor die bome gaan swewe?
 - 12 Toe sê die bome vir die wingerdstok: Kom jy, wees koning oor ons.
 - 13 Maar die wingerdstok het vir hulle gesê: Sou ek my mos opgee wat Aleim en die mense vrolik maak, en oor die bome gaan swewe?

- 14 Toe sê al die bome vir die steekdoring: Kom jy, wees koning oor ons!
- 15 En die steekdoring het vir die bome gesê: As julle in waarheid my as koning oor julle salf, kom dan, skuil in my skaduwee; maar so nie, laat daar dan vuur uitgaan uit die steekdoring en die seders van die Libanon verteer.
- 16 As julle dan nou in waarheid en in opregtheid gehandel het deur Abimelech koning te maak, en as julle goed gedoen het aan Jerúbbaäl en sy huis, en as julle aan hom gedoen het na die verdienste van sy hande—
- 17 julle vir wie my vader geveg en sy lewe gewaag het, en wat hy uit die hand van die Midianiete gered het,
- 18 maar wat vandag opgestaan het teen die huis van my vader, en sy seuns, sewentig man, op een klip vermoor het en Abimelech, die seun van sy slavin, koning gemaak het oor die burgers van Sigem omdat hy julle broer is—
- 19 as julle dan vandag in waarheid en in opregtheid gehandel het met Jerúbbaäl en sy huis, wees dan vrolik oor Abimelech, en mag hy ook vrolik wees oor julle.
- 20 Maar so nie, laat daar dan vuur uitgaan uit Abimelech en die burgers van Sigem en die huis Millo verteer; en laat daar vuur uitgaan uit die burgers van Sigem en uit die huis Millo en Abimelech verteer.
- 21 Daarop het Jotam padgegee en weggevlug en na Beër gegaan en daar gebly vanweë Abimelech, sy broer.
- 22 Toe Abimelech drie jaar oor Israhel geheers het,
- 23 het Aleim ‘n bose gees gestuur tussen Abimelech en die burgers van Sigem, en die burgers van Sigem het troueloos gehandel teen Abimelech,
- 24 sodat die onreg teen die sewentig seuns van Jerúbbaäl sou uitkom, en Hy hulle bloed sou lê op hul broer Abimelech wat hulle vermoor het, ook op die burgers van Sigem wat sy hande versterk het om sy broers te vermoor.
- 25 So het die burgers van Sigem dan teen hom hinderlae opgestel bo-op die berge en almal beroof wat op die pad by hulle verbykom. En dit is aan Abimelech meegedeel.
- 26 Toe kom Gaäl, die seun van Ebed, met sy broers en hulle trek oor na Sigem toe; en die burgers van Sigem het op hom vertrou.
- 27 En hulle het uitgegaan in die veld en hulle wingerde afgeoes en uitgetrap en oesfees gehou; daarop het hulle in die huis van hulle god ingegaan en geëet en gedrink en Abimelech gevloek.
- 28 Toe sê Gaäl, die seun van Ebed: Wie is Abimelech—en wat is Sigem—dat ons hom sou dien? Is hy nie die seun van Jerúbbaäl, en is Sebul nie sy stadsbestuurder nie? Dien die manne van Hemor, die vader van Sigem, maar waarom moet ons hom dien?
- 29 Ag, was hierdie volk maar in my hand, dan sou ek Abimelech wegjaag! En met die oog op Abimelech het hy gesê: Vermeerder maar jou leër en trek uit!
- 30 Toe Sebul, die owerste van die stad, die woorde van Gaäl, die seun van Ebed, hoor, het hy kwaad geword
- 31 en listig boodskappers na Abimelech gestuur om te sê: Kyk, Gaäl, die seun van Ebed, met sy broers, het in Sigem gekom, en kyk, hulle maak die stad teen u op.
- 32 Maak dan nou in die nag klaar, u met die manskappe wat by u is, en stel ‘n hinderlaag op in die veld.
- 33 Dan kan u in die môre vroeg as die son uitkom, u gereed hou en ‘n aanval teen die stad maak; en as hy met die manskappe wat by hom is, uittrek na u toe, handel dan met hom na bevind van sake.
- 34 Daarop het Abimelech en al die manskappe wat by hom was, in die nag klaargemaak en hinderlae in vier dele by Sigem opgestel.
- 35 En Gaäl, die seun van Ebed, het uitgegaan en by die ingang van die stadspoort gaan staan; en toe Abimelech en al die manskappe wat by hom was, opstaan uit die hinderlaag,
- 36 sien Gaäl die manskappe en sê vir Sebul: Kyk, daar kom mense van die bergtoppe af; maar Sebul sê vir hom: Jy sien die skaduwee van die berge vir mense aan!
- 37 Maar Gaäl hou aan en sê: Kyk, daar kom mense van die hoogste punt van die land af, en een deel kom uit die rigting van die eik van die towenaar.
- 38 Daarop sê Sebul vir hom: Waar is nou jou mond waarmee jy gesê het: Wie is Abimelech, dat ons hom sou dien? Is dit nie die manskappe wat jy verag het nie? Trek nou tog uit en veg teen hulle!
- 39 Toe trek Gaäl uit voor die burgers van Sigem en veg teen Abimelech.
- 40 Maar Abimelech het hom agtervolg, en hy het voor hom uit gevlug, en baie het gesneuwel tot by die ingang van die poort.
- 41 En Abimelech het in Aruma gebly, maar Sebul het Gaäl en sy broers verjaag, dat hulle nie in Sigem kon bly woon nie.
- 42 En toe die mense die volgende dag uittrek in die veld, is dit aan Abimelech meegedeel.
- 43 Daarop het hy die manskappe geneem en hulle in drie dele verdeel en ‘n hinderlaag opgestel in die veld; en toe hy sien dat die mense die stad uittrek, val hy op hulle aan en verslaan hulle.
- 44 Want Abimelech en die dele wat by hom was, het ingestorm en gaan staan by die ingang van die stadspoort, en die ander twee dele het almal wat in die veld was, bestorm en hulle verslaan.
- 45 En Abimelech het daardie hele dag teen die stad geveg en die stad ingeneem en die mense wat daarin was, gedood en die stad afgebreek en dit met sout besaai.
- 46 Toe al die burgers van die toring van Sigem dit hoor, gaan hulle in die kelder van die tempel van El-Berit in.
- 47 En toe dit aan Abimelech meegedeel is dat al die burgers van die toring van Sigem bymekaargekom het,
- 48 klim Abimelech, hy en al die manskappe wat by hom was, op die berg Salmon; en Abimelech het byle met hom saamgeneem en ‘n boomtak afgekap en opgetel en dit op sy skouer gesit en aan die manskappe wat by hom was, gesê: Wat julle my sien doen, doen dit my gou na.
- 49 Daarop kap al die manskappe ook elkeen sy tak af en hulle volg Abimelech en gooi dit op die kelder en steek die kelder bo-op hulle aan die brand, sodat ook al die

mense van die Sigemstoring, omtrent duisend manne en vroue, gesterf het.

- 50 Daarna het Abimelech na Tebes getrek en Tebes beleër en dit ingeneem.
- 51 Maar in die middel van die stad was 'n sterk toring; en daarheen het al die manne en vroue en al die burgers van die stad gevlug, en hulle het agter hulle toegesluit en bo-op die dak van die toring geklim.
- 52 En Abimelech het gekom tot by die toring en daarteen geveg; maar toe hy nader kom tot by die ingang van die toring om dit met vuur te verbrand,
- 53 gooi 'n vrou die boonste meulsteen op die hoof van Abimelech en verbrysel sy skedel.
- 54 Toe roep hy gou die dienaar, sy wapendraer, en sê vir hom: Trek jou swaard uit en maak my van kant, dat hulle nie van my kan sê: 'n Vrou het hom gedood nie. Daarop het sy dienaar hom deurboor, en hy het gesterwe.
- 55 En toe die manne van Israhel sien dat Abimelech dood was, het hulle elkeen na sy woonplek gegaan.
- 56 So het Aleim dan die kwaad van Abimelech vergelde wat hy sy vader aangedoen het deur sy sewentig broers te vermoor.
- 57 En al die kwaad van die manne van Sigem het Aleim op hulle eie hoof laat neerkom; en die vloek van Jotam, die seun van Jerúbbaäl, het oor hulle gekom.

Israhel word Verneder.

Tola en lair

- 10** En ná Abimelech het Tola, die seun van Pua, die seun van Dodo, 'n man uit Issaskar, opgetree om Israhel te verlos; en hy het gewoon in Samir op die gebergte van Efraim.
- 2 En hy het Israhel drie en twintig jaar lank gerig; en hy het gesterwe en is in Samir begrawe.
- 3 En ná hom het Jaïr, die Gileadiet, opgetree, en hy het Israhel twee en twintig jaar lank gerig.
- 4 En hy het dertig seuns gehad, wat op dertig jong esels gery en dertig stede gehad het; dié word tot vandag toe die Jaïrsdorpe genoem wat in die land Gilead lê.
- 5 En Jaïr het gesterwe en is in Kamon begrawe.
- 6 En die kinders van Israhel het weer gedoen wat verkeerd was in die oë van IEUE, en hulle het die Baäls en die Astartes gedien, en die skynbeelde van Aram en die skynbeelde van Sidon en die skynbeelde van Moab en die skynbeelde van die kinders van Ammon en die skynbeelde van die Filistyne, en hulle het IEUE verlaat en Hom nie gedien nie.
- 7 Daarom het die toorn van IEUE ontvlam teen Israhel, en Hy het hulle verkoop in die hand van die Filistyne en in die hand van die kinders van Ammon.
- 8 En hulle het die kinders van Israhel verpletter en verdruk in daardie jaar, agttien jaar lank, al die kinders van Israhel wat oorkant die Jordaan gewoon het in die land van die Amoriete, wat in Gilead was.
- 9 Daarby het die kinders van Ammon die Jordaan oorgetrek om ook teen Juda en Benjamin en die huis van Efraim te veg, sodat Israhel dit baie benoud gehad het.

- 10 Toe roep die kinders van Israhel IEUE aan en sê: Ons het teen U gesondig, want ons het onse Aleim verlaat en die Baäls gedien.
- 11 Maar IEUE het aan die kinders van Israhel gesê: Het Ek julle nie van die Egiptenaars en van die Amoriete, van die kinders van Ammon en van die Filistyne—
- 12 en toe die Sidoniërs en Amalekiete en Maoniete julle verdruk en julle My aangeroep het—julle uit hulle hand verlos nie?
- 13 Maar julle het My verlaat en ander skynbeelde gedien; daarom sal Ek julle nie meer verlos nie.
- 14 Gaan heen en roep die skynbeelde aan wat julle verkies het; laat dié julle verlos in die tyd van julle benoudheid.
- 15 Toe sê die kinders van Israhel aan IEUE: Ons het gesondig; maak met ons net soos dit goed is in u oë; verlos ons tog net vandag.
- 16 En hulle het die vreemde skynbeelde uit hulle midde verwyder en IEUE gedien; toe het Hy ongeduldig geword oor die moeite van Israhel.
- 17 En die kinders van Ammon is byeengeroep en het laer opgeslaan in Gilead; maar die kinders van Israhel het bymekaargekom en laer opgeslaan by Mispa.
- 18 Toe sê die manskappe, die vorste van Gilead, die een aan die ander: Wie is die man wat sal begin om te veg teen die kinders van Ammon? Hy sal hoof wees oor al die inwoners van Gilead.

Iephtha Bevry Israhel.

- 11** En Jefta, die Gileadiet, was 'n dapper held, maar hy was die seun van 'n hoer; en Gilead was die vader van Jefta.
- 2 En toe die vrou van Gilead vir hom seuns baar, en die seuns van die vrou groot word, het hulle Jefta weggejaag en vir hom gesê: Jy mag in ons familie nie erwe nie, want jy is die seun van 'n ander vrou.
- 3 Daarop vlug Jefta van sy broers af weg en hy gaan woon in die land Tob; en ligsinnige manne het by Jefta aangesluit en saam met hom uitgetrek.
- 4 En 'n tyd daarna het die kinders van Ammon oorlog gevoer teen Israhel.
- 5 Maar toe die kinders van Ammon oorlog voer teen Israhel, het die oudstes van Gilead Jefta gaan haal uit die land Tob;
- 6 en hulle het vir Jefta gesê: Kom en wees ons aanvoerder, dat ons kan veg teen die kinders van Ammon.
- 7 Maar Jefta antwoord die oudstes van Gilead: Het julle my nie gehaat en my uit my vader se huis weggejaag nie? Waarom kom julle dan nou na my, nou dat julle in die benoudheid sit?
- 8 Toe sê die oudstes van Gilead vir Jefta: Daarom kom ons nou na jou terug, dat jy met ons kan saamtrek en teen die kinders van Ammon veg, en dat jy ons hoof kan wees oor al die inwoners van Gilead.
- 9 Daarop antwoord Jefta die oudstes van Gilead: As julle my laat terugkom om teen die kinders van Ammon te veg en IEUE hulle aan my oorgee, dan moet ek julle hoof word.

- 10 Toe sê die oudstes van Gilead vir Jefta: Die IEUE sal hoorder wees tussen ons. Waarlik, soos jy gesê het, so sal ons doen.
- 11 So het Jefta dan met die oudstes van Gilead saamgegaan, en die volk het hom as hoof en aanvoerder oor hulle aangestel, en Jefta het al sy woorde voor die aangesig van IEUE in Mispa gespreek.
- 12 Toe stuur Jefta boodskappers na die koning van die kinders van Ammon om te vra: Wat het ek met u te doen, dat u na my kom om teen my land te veg?
- 13 En die koning van die kinders van Ammon sê aan die boodskappers van Jefta: Israhel het my land geneem toe hy opgetrek het uit Egipte, van die Arnon af tot by die Jabbok en tot by die Jordaan; gee dit dan nou in vrede terug.
- 14 En Jefta het nog weer boodskappers gestuur na die koning van die kinders van Ammon
- 15 en vir hom gesê: So sê Jefta: Israhel het die land Moab en die land van die kinders van Ammon nie geneem nie.
- 16 Want Israhel het toe hy uit Egipte opgetrek het, deur die woestyn gegaan tot by die Skelfsee en het by Kades gekom.
- 17 En Israhel het boodskappers gestuur na die koning van Edom om te sê: Laat my tog deur u land trek; maar die koning van Edom het geen gehoor gegee nie; en na die koning van Moab het hy gestuur, maar hy wou ook nie. Daarom het Israhel in Kades gebly.
- 18 Verder het hy deur die woestyn gegaan en om die land Edom en die land Moab getrek en gekom aan die oostekant van die land Moab; en hulle het laer opgeslaan oorkant die Arnon, maar nie in die gebied van Moab ingekom nie, want die Arnon is die grens van Moab.
- 19 Daarop het Israhel boodskappers gestuur na Sihon, die koning van die Amoriete, die koning van Hesbon, en Israhel het vir hom gesê: Laat ons tog deur u land trek na my plek toe.
- 20 Maar Sihon het Israhel nie vertrou om deur sy gebied te trek nie, en Sihon het al sy manskappe versamel, en hulle het laer opgeslaan in Jahas en teen Israhel geveg.
- 21 Maar IEUE, die Aleim van Israhel, het Sihon en sy hele volk in die hand van Israhel gegee, en dié het hulle verslaan; sodat Israhel die hele land van die Amoriete, die inwoners van daardie land, in besit geneem het.
- 22 En hulle het die hele grondgebied van die Amoriete, van die Arnon af tot by die Jabbok en van die woestyn af tot by die Jordaan, in besit geneem.
- 23 So het IEUE, die Aleim van Israhel, dan die Amoriete voor sy volk Israhel uit verdrywe, en wil u dit in besit neem?
- 24 Sal u dit nie in besit neem wat u god Kamos u as 'n besitting gee, en óns alles wat IEUE onse Aleim voor ons uit verdrywe, in besit neem nie?
- 25 En is u nou soveel beter as Balak, die seun van Sippor, die koning van Moab? Het hy ooit met Israhel getwis, of ooit teen hulle geveg?
- 26 Terwyl Israhel in Hesbon met sy onderhorige plekke en in Aroër met sy onderhorige plekke en in al die stede wat

langs die Arnon lê, drie honderd jaar lank gewoon het, waarom het julle dit dan nie in dié tyd ontset nie?

- 27 So het ek dan nie teen u gesondig nie, maar ú handel so sleg met my om teen my oorlog te voer. Mag IEUE, die Regter, vandag oordeel tussen die kinders van Israhel en die kinders van Ammon!
- 28 Maar die koning van die kinders van Ammon het nie geluister na die woorde van Jefta wat hy hom laat weet het nie.
- 29 Toe het die Gees van IEUE op Jefta gekom, en hy het oorgetrek na Gilead en Manasse en verder deur na Mispe in Gilead; en van Mispe in Gilead het hy deurgetrek na die kinders van Ammon.
- 30 En Jefta het aan IEUE 'n gelofte gedoen en gesê: As U werklik die kinders van Ammon in my hand gee,
- 31 dan sal wat uitkom, wat uit die deure van my huis uitkom my tegemoet, as ek in vrede terugkom van die kinders van Ammon, aan IEUE behoort, en ek sal dit as 'n brandoffer bring.
- 32 Daarop het Jefta deurgetrek na die kinders van Ammon om teen hulle te veg, en IEUE het hulle in sy hand gegee.
- 33 En hy het hulle verslaan van Aroër af in die rigting na Minnit, twintig stede, en tot by Abel-Kerámim—'n baie groot slag; sodat die kinders van Ammon verneder is voor die kinders van Israhel.
- 34 En toe Jefta in Mispa by sy huis kom, gaan sy dogter juis uit hom tegemoet met tamboeryne en koordanse; en sy was die enigste kind: hy het geen seun of dogter buiten haar gehad nie.
- 35 En net toe hy haar sien, skeur hy sy klere en sê: Ag, my dogter, jy druk my heeltemal neer, en jy stort my in die ongeluk! Want ek het my mond geopen teenoor IEUE, en ek kan nie terugtrek nie.
- 36 En sy antwoord hom: My vader, as u u mond geopen het teenoor IEUE, maak met my soos uit u mond uitgegaan het nadat IEUE u volkome wraak verskaf het op u vyande, op die kinders van Ammon.
- 37 Verder het sy vir haar vader gesê: Laat dít my toegestaan word: laat my twee maande vry, dat ek kan weggaan en afdaal na die berge en my maagdelike staat beween, ek en my vriendinne.
- 38 En hy sê: Gaan! En hy het haar vir twee maande laat gaan. Sy het toe weggegaan met haar vriendinne en haar maagdelike staat op die berge beween.
- 39 En aan die end van twee maande het sy na haar vader teruggekom, en hy het die gelofte wat deur hom gedoen is, aan haar voltrek; en sy het geen man beken nie. En dit het 'n gewoonte geword in Israhel
- 40 dat die dogters van Israhel jaar vir jaar heengaan om die dogter van Jefta, die Gileadiet, te besing, vier dae in die jaar.

Iephtha slag Efraim.

12

En die manne van Efraim is saamgeroep en het oorgetrek na Safon toe en vir Jefta gesê: Waarom het u deurgetrek om teen die kinders van Ammon te veg en

óns nie geroep om saam met u te trek nie? Ons sal u huis bo u met vuur verbrand.

- 2 Maar Jefta sê vir hulle: Ek en my volk het 'n hewige twis met die kinders van Ammon gehad, en ek het julle opgeroep, maar julle het my nie uit hulle hand verlos nie.
- 3 En toe ek sien dat jy nie help nie, het ek my lewe gewaag en deurgetrek na die kinders van Ammon; en IEUE het hulle in my hand gegee. Waarom het julle dan vandag teen my opgetrek om teen my oorlog te voer?
- 4 Daarop versamel Jefta al die manne van Gilead om teen Efraim te veg; en die manne van Gilead het Efraim verslaan, omdat hulle gesê het: Julle, Gileadiete, is vlugteling van Efraim, in die midde van Efraim en Manasse.
- 5 En Gilead het die Efraimiete van die Jordaan-driewe afgesny; en as die vlugteling van Efraim sê: Ek wil deurgaen—dan vra die manne van Gilead vir hom: Is jy 'n Efraimiet? As hy sê: Nee,
- 6 dan vra hulle hom: Sê bietjie: Sjobbolet! En as hy sê: Sibbolet! en nie ag gee om dit reg uit te spreek nie, dan gryp hulle hom en maak hom by die Jordaan-driewe dood. So het daar dan in dié tyd van Efraim twee en veertig duisend man geval.
- 7 En Jefta het Israëel ses jaar lank gerig; en Jefta, die Gileadiet, het gesterwe en is begrawe in een van die stede van Gilead.

Ibsan, Elon en Abdon.

- 8 En ná hom het Ebsan, uit Betlehem, Israëel gerig.
- 9 En hy het dertig seuns gehad, en dertig dogters het hy uitgehuwelik en van buite af dertig dogters vir sy seuns ingebring; en hy het Israëel sewe jaar lank gerig.
- 10 En Ebsan het gesterwe en is begrawe in Betlehem.
- 11 En ná hom het Elon, die Sebuloniet, Israëel gerig; en hy het Israëel tien jaar lank gerig.
- 12 En Elon, die Sebuloniet, het gesterwe en is begrawe in Ajalon, in die land Sébulon.
- 13 En ná hom het Abdon, die seun van Hillel, die Pireatoniet, Israëel gerig.
- 14 En hy het veertig seuns en dertig kleinseuns gehad wat op sewentig jong esels gery het; en hy het Israëel agt jaar lank gerig.
- 15 En Abdon, die seun van Hillel, die Pireatoniet, het gesterwe en is begrawe in Píreaton, in die land Efraim, op die gebergte van die Amalekiete.

Die Geboorte van Sampson.

13

En toe die kinders van Israëel weer doen wat verkeerd is in die oë van IEUE, het IEUE hulle oorgegee in die hand van die Filistyne, veertig jaar lank.

- 2 En daar was 'n man uit Sórea, uit die geslag van die Daniete, met die naam van Manóag; en sy vrou was onvrugbaar en het geen kinders gehad nie.
- 3 Maar die Engel van IEUE het aan die vrou verskyn en vir haar gesê: Kyk, jy is onvrugbaar en het geen kinders gehad nie, maar jy sal swanger word en 'n seun baar.

- 4 Neem jou dan nou tog in ag en drink geen wyn of sterk drank nie en eet niks wat onrein is nie.
- 5 Want kyk, jy sal swanger word en 'n seun baar, en geen skeermes mag op sy hoof kom nie; want die seun sal van die moederskoot af 'n nasireër van Aleim wees, en hy sal Israëel begin verlos uit die hand van die Filistyne.
- 6 Daarop kom die vrou in en spreek met haar man en sê: 'n Man van Aleim het na my gekom, en sy voorkoms was soos die voorkoms van die Engel van Aleim, baie vreeslik; maar ek het Hom nie gevra waar Hy vandaan was nie, en sy naam het hy my nie meegedeel nie.
- 7 Maar Hy het vir my gesê: Kyk, jy sal swanger word en 'n seun baar; drink dan nou geen wyn of sterk drank nie, en eet niks wat onrein is nie; want die seun sal 'n nasireër van Aleim wees van die moederskoot af tot die dag van sy dood toe.
- 8 En Manóag het tot IEUE gebid en gesê: Ag, Ioseph, laat tog die man van Aleim wat U gestuur het, nog 'n keer na ons toe kom, dat hy ons kan leer hoe ons moet maak met die seun wat gebore sal word.
- 9 En Aleim het geluister na die stem van Manóag, sodat die Engel van Aleim nog 'n keer na die vrou gekom het terwyl sy in die veld sit en haar man Manóag nie by haar was nie.
- 10 En die vrou het haastig geloop en haar man dit vertel en vir hom gesê: Kyk, die man het aan my verskyn wat die ander dag na my gekom het.
- 11 Toe staan Manóag op en loop agter sy vrou aan, en hy kom by die man en vra hom: Is U die man wat met dié vrou gespreek het? Toe sê Hy: Ja.
- 12 Daarop vra Manóag: As u woorde nou uitkom, wat moet die leefwyse en die werk van die seun wees?
- 13 Toe sê die Engel van IEUE aan Manóag: Vir alles wat Ek aan die vrou gesê het, moet sy haar in ag neem.
- 14 Van alles wat van die wingerdstok afkomstig is, mag sy nie eet nie; en geen wyn of sterk drank moet sy drink nie en niks eet wat onrein is nie; alles wat Ek haar beveel het, moet sy onderhou.
- 15 Manóag sê aan die Engel van IEUE: Laat ons U tog ophou, dat ons 'n bokkie vir U kan berei.
- 16 En die Engel van IEUE antwoord Manóag: Al hou jy My op, Ek sal nie van jou brood eet nie; maar as jy 'n brandoffer wil berei, offer dit dan aan IEUE. Want Manóag het nie geweet dat dit die Engel van IEUE was nie.
- 17 Daarop vra Manóag die Engel van IEUE: Wat is u naam, dat ons U kan vereer as u woord uitkom?
- 18 En die Engel van IEUE sê vir hom: Waarom vra jy dan na my naam terwyl hy wonderbaar is?
- 19 Toe neem Manóag die bokkie en die spysoffer en offer dit op die rots aan IEUE terwyl Hy wonderbaarlik handel voor die oë van Manóag en sy vrou:
- 20 toe die vlam van die altaar opstyg na bo, het die Engel van IEUE in die vlam van die altaar opgevaar; en Manóag en sy vrou het dit gesien en met hulle aangesig op die grond geval.

- 21 En die Engel van IEUE het verder nie meer aan Manóag en sy vrou verskyn nie. Daarop bemerk Manóag dat dit die Engel van IEUE was.
- 22 En Manóag sê vir sy vrou: Ons sal sekerlik sterwe, omdat ons Aleim gesien het.
- 23 Maar sy vrou sê vir hom: As IEUE ons wou laat sterwe, sou Hy nie uit ons hand 'n brandoffer en 'n spysoffer aangeneem en ons al hierdie dinge laat sien en ons nou sulke dinge laat hoor het nie.
- 24 En die vrou het 'n seun gebaar en hom Sampson genoem; en die kind het groot geword, en IEUE het hom geseën.
- 25 En die Gees van IEUE het hom begin drywe in die laer van Dan tussen Sórea en Estáol.

Maaltyd van Sampson. Raaisel opgelos.

- 14** Toe Sampson afgegaan het na Timna, sien hy in Timna 'n vrou uit die dogters van die Filistyne;
- 2 en hy het opgegaan en dit aan sy vader en sy moeder vertel en gesê: Ek het 'n vrou uit die dogters van die Filistyne in Timna gesien; neem haar dan nou as vrou vir my.
- 3 Maar sy vader en sy moeder sê vir hom: Is daar onder die dogters van jou broers en onder my hele volk nie 'n vrou, dat jy heengaan om 'n vrou uit die Filistyne, die onbesnedenes, te neem nie? En Sampson sê aan sy vader: Neem haar vir my, want sy geval my.
- 4 Maar sy vader en sy moeder het nie geweet dat dit van IEUE kom nie; want hy het rede gesoek teen die Filistyne; in dié tyd naamlik het die Filistyne oor Israhel geheers.
- 5 En Sampson het met sy vader en sy moeder afgegaan na Timna; en toe hulle by die wingerde van Timna kom, storm daar 'n jong leeu brullende op hom af.
- 6 Maar die Gees van IEUE het oor hom vaardig geword; en hy het dit verskeur soos 'n mens 'n bokkie verskeur sonder dat daar iets in sy hand was; maar hy het sy vader en sy moeder nie vertel wat hy gedoen het nie.
- 7 Toe gaan hy af en praat met die vrou; en sy het Sampson geval.
- 8 En 'n tyd daarna het hy teruggegaan om haar te gaan haal; en toe hy uitdraai om na die dooie leeu te kyk, was daar 'n swerm bye in die dooie liggaam van die leeu, en heuning.
- 9 En hy het dit uitgehaal in sy hande en aldeur geloop en eet, en na sy vader en sy moeder gegaan en aan hulle gegee; en hulle het geëet, maar dat hy die heuning uit die dooie liggaam van die leeu uitgehaal het, vertel hy hulle nie.
- 10 Daarop gaan sy vader na die vrou toe af, en Sampson het daar 'n maaltyd berei; want so het die jongmanne gewoonlik gedoen.
- 11 En toe hulle hom sien, neem hulle dertig vriende om by hom te wees.
- 12 En Sampson sê aan hulle: Laat my tog vir julle 'n raaisel opgee; as julle dit vir my reg uitleê gedurende die sewe dae van die maaltyd en dit uitvind, dan sal ek julle dertig hemde en dertig stel klere gee;

- 13 maar as julle dit vir my nie kan uitleê nie, dan moet julle my dertig hemde en dertig stel klere gee. Toe sê hulle vir hom: Gee maar jou raaisel op, dat ons dit hoor.
- 14 En hy sê vir hulle: Spys het uit die eter uitgegaan, en soetheid uit die sterke. En drie dae lank kon hulle die raaisel nie uitleê nie.
- 15 En op die vierde dag sê hulle aan die vrou van Sampson: Haal jou man oor dat hy die raaisel vir ons uitleê, anders verbrand ons jou en die huis van jou vader met vuur; het julle ons genooi om ons te berowe, of hoe?
- 16 Toe huil die vrou van Sampson by hom en sê: Jy haat my net en het my nie lief nie; jy het my volksgenote die raaisel opgegee, maar vir my het jy dit nie uitgelê nie. En hy antwoord haar: Kyk, vir my vader en my moeder het ek dit nie uitgelê nie, sou ek dit dan vir jou uitleê?
- 17 Maar sy het die sewe dae wat hulle maaltyd geduur het, by hom gehuil; en op die sewende dag het hy dit vir haar uitgelê; want sy het hom gepeers en so die raaisel vir haar volksgenote uitgelê.
- 18 Daarop sê die manne van die stad aan hom op die sewende dag voor sonsondergang: Wat is soeter as heuning, en wat is sterker as 'n leeu? En hy antwoord hulle: As julle nie met my kalf geploeg het nie, sou julle my raaisel nie geraai het nie.
- 19 En die Gees van IEUE het oor hom vaardig geword. Toe gaan hy af na Askalon en slaan dertig man van hulle dood, en neem hulle uitrustings en gee die stelle klere aan die wat die raaisel uitgelê het; en hy het kwaad geword en opgegaan na die huis van sy vader.
- 20 En sy vriend wat as sy bruidsjonker gedien het, het die vrou van Sampson gekry.

Sampson se Oorwinning oor die Filistyne.

- 15** Maar 'n tyd daarna het Sampson in die dae van die koringoes sy vrou besoek met 'n bokkie en gesê: Laat ek na my vrou in die kamer ingaan; maar haar vader het hom nie toegelaat om in te gaan nie.
- 2 En haar vader het gesê: Ek het vir seker gedink dat jy niks om haar gee nie; daarom het ek haar aan jou metgesel gegee; is haar jonger suster nie mooier as sy nie? Laat sy tog jou word in haar plek.
- 3 Maar Sampson het vir hulle gesê: Hierdie keer is ek onskuldig teenoor die Filistyne as ek hulle kwaad aandoen.
- 4 Toe gaan Sampson weg en vang drie honderd jakkalse; en hy neem fakkels en draai stert teen stert, en sit 'n fakkel in die middel tussen elke twee sterte in;
- 5 en hy steek die fakkels aan die brand en los hulle in die ongesnyde graan van die Filistyne; en hy het die miede sowel as die ongesnyde graan en die wingerde en olyfbome aan die brand gestee.
- 6 Toe vra die Filistyne: Wie het dit gedoen? En hulle sê: Sampson, die skoonseun van die Timniet, omdat dié sy vrou geneem en haar aan sy metgesel gegee het. En die Filistyne het opgetrek en haar en haar vader se huis met vuur verbrand.

- 7 Daarop sê Sampson vir hulle: As julle so maak, sal ek sekerlik nie rus voordat ek my op julle gewreek het nie.
- 8 En hy het hulle lendelam geslaan, 'n groot slag. En hy het afgegaan en gebly in die rotskloof van Etam.
- 9 Toe trek die Filistyne nader en slaan laer op in Juda en sprei hulleself uit by Legi.
- 10 En die manne van Juda vra: Waarom het julle teen ons opgetrek? En hulle sê: Ons het opgetrek om Sampson te bind, om aan hom te doen soos hy aan ons gedoen het.
- 11 Daarop trek drie duisend man uit Juda af na die rotskloof van Etam en vra vir Sampson: Weet jy nie dat die Filistyne oor ons heers nie, en wat het jy ons nou aangedoen? En hy sê aan hulle: Soos hulle aan my gedoen het, so het ek aan hulle gedoen.
- 12 Toe sê hulle vir hom: Ons het afgekom om jou te bind, om jou oor te gee in die hand van die Filistyne. En Sampson sê aan hulle: Sweer vir my dat julle nie self op my sal aanval nie.
- 13 En hulle antwoord hom: Nee, ons sal jou net vasbind en oorgee in hulle hand, maar doodmaak sal ons jou stellig nie. Daarop bind hulle hom vas met twee nuwe toue en bring hom op uit die rots.
- 14 Toe hy tot by Legi kom, juig die Filistyne hom tegemoet; maar die Gees van IEUE het oor hom vaardig geword, en die toue wat aan sy arms was, het geword soos linnedrade wat in die vuur brand, en sy bande het versmelt van sy hande af.
- 15 En hy het 'n vars eselskakebeen gevind en sy hand uitgesteek en dit geneem en daar duisend man mee verslaan.
- 16 En Sampson het gesê: Met 'n eselskakebeen het ek een klomp, twee klompe, met 'n eselskakebeen het ek duisend man verslaan.
- 17 En toe hy klaar gespreek het, gooi hy die kakebeen uit sy hand en noem dié plek Kakebeenshoogte.
- 18 Daarop kry hy baie dors en roep IEUE aan en sê: U het deur die hand van u kneg hierdie groot verlossing gegee, en moet ek nou van dors sterwe en in die hand van die onbesnedenes val?
- 19 Toe kloof Aleim die holte wat by Legi is, en daar kom water uit; en hy het gedrink, en sy gees het teruggekom, en hy het weer opgelewe. Daarom noem hulle dit Roepersfontein, wat vandag nog by Legi is.
- 20 En hy het Israël gerig in die dae van die Filistyne, twintig jaar lank.

Sampson en Delila.

- 16** En Sampson het na Gasa gegaan en daar 'n hoer gesien en by haar ingegaan.
- 2 Toe die Gasiëte die tyding kry: Sampson het hier ingekom, omsingel hulle hom en lê hom die hele nag voor by die stadspoort, maar die hele nag het hulle hul stilgehou en gesê: Teen dagbreek sal ons hom doodmaak.
- 3 En Sampson het gelê tot middernag; maar teen middernag het hy opgestaan en die deure van die stadspoort en die twee deurposte gegryp en dié met grendel en al uitgeruk

- en op sy skouers gesit en dit opgedra na die top van die berg wat teenoor Hebron lê.
- 4 Daarna het hy 'n vrou in die dal Sorek liefgeky, wie se naam Delila was.
- 5 Toe kom die vorste van die Filistyne na haar op en sê vir haar: Haal hom oor en vind uit waardeur sy krag so groot is, en waardeur ons hom kan oorweldig en hom kan bind om hom te bedwing; dan sal ons jou elkeen elf honderd sikkels silwer gee.
- 6 Toe vra Delila vir Sampson: vertel my tog waardeur jou krag so groot is, en waarmee jy gebind kan word om jou te bedwing.
- 7 En Sampson sê vir haar: As hulle my bind met sewe vars lyne wat nie uitgedroog is nie, dan sal ek swak word en wees soos 'n ander mens.
- 8 Daarop het die vorste van die Filistyne vir haar sewe vars lyne gebring wat nie uitgedroog was nie, en sy het hom daarmee gebind.
- 9 En terwyl haar spioene in die kamer klaar sit, sê sy vir hom: Die Filistyne op jou, Sampson! Toe verbreek hy die lyne soos 'n vlasdraad breek as dit vuur ruik; maar sy krag het nie bekend geword nie.
- 10 Toe sê Delila vir Sampson: Kyk, jy het my bedrieg en vir my leuens vertel; vertel my nou tog waarmee jy gebind kan word.
- 11 En hy antwoord haar: As hulle my stewig vasbind met nuwe toue waarmee geen werk gedoen is nie, dan sal ek swak word en wees soos 'n ander mens.
- 12 Toe het Delila nuwe toue geneem en hom daarmee gebind en vir hom gesê: Die Filistyne op jou, Sampson! terwyl die spioene in die kamer klaarsit; maar hy het dit soos 'n draad van sy arms af verbreek.
- 13 En Delila sê vir Sampson: Tot nou toe het jy my bedrieg en vir my leuens vertel; vertel my waarmee jy gebind kan word. En hy antwoord haar: As jy die sewe haarvlegsels van my hoof met die weefsel saam invleg.
- 14 Sy druk dié toe vas met die pen en sê vir hom: Die Filistyne op jou, Sampson! En hy het wakker geword uit sy slaap en die weefpen met die weefsel uitgeruk.
- 15 Toe sê sy vir hom: Hoe kan jy sê: Ek het jou lief! terwyl jou hart nie met my is nie? Drie maal het jy my nou al bedrieg en my nie meegedeel waardeur jou krag so groot is nie.
- 16 En omdat sy hom met haar woorde aldaar gepers en by hom aangedring het, het hy so ongeduldig geword, dat hy kon sterf.
- 17 En hy het sy hele hart aan haar bekend gemaak en aan haar gesê: Daar het nooit 'n skeermes oor my hoof gekom nie, want ek is 'n nasireër van Aleim van my moeder se skoot af: as ek geskeer sou word, sou my krag van my wyk en ek swak word en wees soos al die mense.
- 18 Toe Delila sien dat hy sy hele hart aan haar bekend gemaak het, laat sy die vorste van die Filistyne roep en sê: Kom hierdie keer op, want hy het sy hele hart aan my bekend gemaak. Toe kom die vorste van die Filistyne na haar op en bring die geld met hulle saam.

- 19 En sy het hom op haar skoot aan die slaap gemaak en ‘n man geroep en die sewe haarvlegsels van sy hoof afgeskeer. En sy het begin om hom te bedwing, en sy krag het van hom gewyk.
- 20 Toe sê sy: Die Filistyne op jou, Sampson! En toe hy uit sy slaap wakker word, sê hy: Ek sal vry uitgaan soos die vorige kere en my losruk. Want hy het nie geweet dat IEUE van hom gewyk het nie.
- 21 Daarop het die Filistyne hom gegryp en sy oë uitgesteek en hom afgebring na Gasa en met koperkettings gebind; en hy moes maal in die gevangenis.
- 22 Maar die hare van sy hoof het weer begin groei sodra dit afgeskeer was.

Sampson se laaste daad.

- 23 En die vorste van die Filistyne het vergader om ‘n groot offer te bring aan hulle god Dagon en om vrolik te wees; en hulle het gesê: Ons god het ons vyand Sampson in ons hand gegee.
- 24 En toe die volk hom sien, prys hulle hul god; want hulle het gesê: Ons god het ons vyand en die rinneweerder van ons land, wat ook baie van ons laat sneuwel het, in ons hand gegee.
- 25 En toe hulle hart vrolik was, sê hulle: Roep Sampson, dat hy vir ons speel; en hulle het Sampson uit die gevangenis geroep; en hy het voor hulle gespeel, en hulle het hom tussen die pilare laat staan.
- 26 Daarop sê Sampson aan die dienaar wat hom aan die hand hou: Laat my staan, en laat my die pilare betas waar die huis op rus, dat ek daarteen kan leun.
- 27 En die huis was vol manne en vroue, en al die vorste van die Filistyne was daar, en op die dak omtrent drie duisend manne en vroue wat kyk hoe Sampson speel.
- 28 Toe roep Sampson IEUE aan en sê: Ioseph, IEUE, dink tog aan my en versterk my tog net hierdie keer, o Aleim, dat ek my oor een van my twee oë op die Filistyne kan wreek!
- 29 En Sampson slaan sy arms om die twee middelste pilare waar die huis op gerus het, die een met sy regter— en die ander met sy linkerhand, en leun teen hulle aan.
- 30 En Sampson sê: Laat my sterwe saam met die Filistyne! En hy buig hom met krag, sodat die huis inval op die vorste en op al die mense wat daarin was. So was dan die dooies wat hy by sy sterwe gedood het, meer as die wat hy in sy lewe gedood het.
- 31 Sy broers en sy hele familie het toe afgekom en hom opgeneem en opwaarts gebring en hom begrawe tussen Sórea en Estáol in die graf van sy vader Manóag. En hy het Israhel twintig jaar lank gerig.

Die Skynbeelde van Mika.

- 17** Daar was ‘n man van die gebergte van Efraim met die naam van Mika.
- 2 Dié het aan sy moeder gesê: die elf honderd sikkels silwer wat van u geneem is en waaroor u ‘n vloek uitgespreek het en dit ook voor my ore gesê het—hier is die geld by

my, ék het dit geneem. Toe sê sy moeder: Mag jy geseënd wees deur IEUE, my seun!

- 3 En hy het aan sy moeder die elf honderd sikkels silwer teruggegee. Maar sy moeder het gesê: Ek heilig plegtig die geld aan IEUE; uit my hand is dit vir my seun om ‘n gesnede en ‘n gegote beeld te maak; ek sal dit dan nou aan jou teruggee.
- 4 Toe hy dan die geld aan sy moeder teruggegee het, neem sy moeder twee honderd sikkels silwer en gee dit aan ‘n goudsmid; en hy het daar ‘n gesnede en ‘n gegote beeld van gemaak wat in die huis van Mika gekom het.
- 5 Die man Mika het naamlik ‘n godshuis gehad, en hy het ‘n skouerkleed en huisgode gemaak en een van sy seuns aangestel om vir hom priester te wees.
- 6 In dié dae was daar geen koning in Israhel nie: elkeen het gedoen wat reg was in sy oë.
- 7 En daar was ‘n jongman van Betlehem-Juda, uit die geslag van Juda; hy was ‘n Leviet wat daar as vreemdeling vertoef het.
- 8 En die man het uit die stad, uit Betlehem-Juda, getrek om te vertoef waar hy plek kon kry; en op sy reis het hy in die gebergte van Efraim gekom tot by die huis van Mika.
- 9 En Mika vra hom: Waar kom u vandaan? Toe sê hy vir hom: Ek is ‘n Leviet, uit Betlehem-Juda, en ek is op trek om te vertoef waar ek plek kan kry.
- 10 En Mika sê vir hom: Bly by my, en wees vir my ‘n vader en ‘n priester, dan sal ek u jaarliks tien sikkels silwer gee en ‘n stel klere en u lewensonderhoud. En die Leviet het gegaan,
- 11 en die Leviet het ingewillig om by die man te bly; en die jongman was vir hom soos een van sy seuns.
- 12 En Mika het die Leviet aangestel, sodat die jongman sy priester geword het, en hy was in die huis van Mika.
- 13 Toe sê Mika: Nou weet ek dat IEUE aan my goed sal doen, omdat ek ‘n Leviet as priester het.

Mika en die Daniëte.

- 18** In dié dae was daar geen koning in Israhel nie; en in dié dae het die stam van die Daniëte vir hom ‘n erfdeel gesoek om in te woon, want tot dié dag toe het onder die stamme van Israhel geen genoegsame erfdeel aan hom toegeval nie.
- 2 En die kinders van Dan het uit al die dele van hulle geslag vyf man, dapper manne, uit Sórea en Estáol gestuur om die land te verken en dit te deursoek, en vir hulle gesê: Gaan deursoek die land. En hulle het die gebergte van Efraim ingegaan tot by die huis van Mika en daar die nag oorgebly.
- 3 Toe hulle by die huis van Mika was en die stem van die jongman, die Leviet, herken, draai hulle daar af en sê vir hom: Wie het jou hierheen gebring, en wat maak jy hier, en wat soek jy hier?
- 4 Daarop sê hy vir hulle: So en so het Mika met my gedoen, en hy het my gehuur, en ek het sy priester geword.
- 5 Toe vra hulle hom: Raadpleeg Aleim tog, dat ons kan weet of ons pad waarop ons reis, voorspoedig sal wees.
- 6 En die priester sê vir hulle: Gaan in vrede; voor IEUE lê julle pad waar julle langs sal gaan.

- 7 Toe gaan die vyf manne weg en hulle kom by Lais; en hulle sien dat die volk wat daarin was, veilig woon volgens die gewoonte van die Sidoniërs, rustig en onbesorg; en daar was niemand wat in enigiets leed doen in die land deur vermoë in besit te neem nie; en hulle was ver van die Sidoniërs af, terwyl hulle met geen mens gemeenskap gehad het nie.
- 8 En toe hulle by hul broers kom in Sórea en Estáol, sê hul broers vir hulle: Wat sê julle?
- 9 En hulle antwoord: Maak klaar, en laat ons teen hulle optrek! Want ons het die land gesien, en kyk, dit is baie goed; en julle sit stil! Wees nie traag om te trek, in te gaan, die land in besit te neem nie.
- 10 As julle daar kom, sal julle by 'n onbesorgde volk kom, en die land is alkante toe wyd; want Aleim gee dit in julle hand, 'n plek waar aan niks op aarde gebrek is nie.
- 11 Toe het daarvandaan weggetrek, uit die geslag van die Daniete, uit Sórea en Estáol, ses honderd man, omgord met wapens.
- 12 En hulle het opgetrek en laer opgeslaan by Kirjat-Jeárim in Juda; daarom noem hulle dié plek Dan-se-Laer tot vandag toe; dit lê daar agter Kirjat-Jeárim.
- 13 En daarvandaan het hulle oorgetrek in die gebergte van Efraim en gekom tot by die huis van Mika.
- 14 Daarop het die vyf man wat gegaan het om die land van Lais te verken, aan hulle broers begin sê: Weet julle dat in hierdie huise 'n skouerkleed en huisgode en 'n gesnede en 'n gegote beeld is? Weet dan nou wat julle moet doen!
- 15 Hulle het toe daarheen uitgedraai en gekom by die huis van die jongman, die Levië, die huis van Mika, en hom na sy welstand gevra.
- 16 Onderwyl die ses honderd man wat uit die kinders van Dan was, met hulle wapens omgord voor die ingang van die poort gaan staan,
- 17 het die vyf man wat gegaan het om die land te verken, opgegaan, daar ingekom, die gesnede beeld en die skouerkleed en die huisgode en die gegote beeld geneem, terwyl die priester by die ingang van die poort bly staan saam met die ses honderd man met wapens omgord.
- 18 Toe daardie manne dan die huis van Mika ingegaan en die gesnede beeld, die skouerkleed en die huisgode en die gegote beeld geneem het, vra die priester vir hulle: Wat maak julle?
- 19 En hulle sê vir hom: Bly stil, sit jou hand op jou mond en gaan saam met ons, en wees vir ons 'n vader en 'n priester: is dit beter vir jou om priester te wees vir die huis van een man of om priester te wees vir 'n stam en 'n geslag in Israëel?
- 20 Toe word die priester se hart vrolik, en hy neem die skouerkleed en die huisgode en die gesnede beeld en gaan tussen die manskappe in.
- 21 En hulle het weggedraai en voortgetrek, met die kinders en die vee en die waardevolle goed op hulle voerpunt.
- 22 Nadat hulle 'n hele ent weg was van Mika se huis af, is die manne van die huise wat by Mika se huis staan, bymekaargeroep, en hulle het die kinders van Dan agtervolg

- 23 en na die kinders van Dan geroep. Toe draai dié hulle gesigte om en vra vir Mika: Wat is dit met jou dat julle bymekaargeroep is?
- 24 En hy sê: My skynbeelde wat ek gemaak het, het julle weggeneem saam met die priester, en julle trek weg; wat het ek nou oor? En hoe kan julle dan vir my sê: Wat is dit met jou?
- 25 Maar die kinders van Dan sê vir hom: Moenie jou stem by ons laat hoor nie, sodat nie miskien manne met 'n bitter gemoed op julle aanval en jy jou eie lewe en die lewe van jou huis verloor nie.
- 26 Daarop gaan die kinders van Dan hulle koers, terwyl Mika, toe hy sien dat hulle sterker was as hy, omdraai en na sy huis teruggaan.
- 27 Maar hulle het saamgeneem wat Mika gemaak het, en die priester wat hy gehad het; en hulle het Lais, 'n rustige en onbesorgde volk, oorval en dié met die skerpte van die swaard verslaan en die stad met vuur verbrand.
- 28 En daar was geen redder nie, want dit was ver van Sidon af en hulle het met niemand gemeenskap gehad nie: dit het in die dal gelê wat by Bet-Rehob behoort. Hulle bou toe die stad weer op en woon daarin,
- 29 en noem die stad Dan, na die naam van hulle vader Dan wat vir Israëel gebore is; maar tevore was die naam van die stad Lais.
- 30 En die kinders van Dan het vir hulle die gesnede beeld opgerig; en Jónatan, die seun van Gersom, die seun van MoÛse, hy en sy seuns was priesters vir die stam van die Daniete tot op die dag van die ontvolking van die land.
- 31 En hulle het vir hulle die gesnede beeld van Mika opgerig wat hy gemaak het, al die dae dat die huis van Aleim in Silo was.

Die Leviet en sy Byvrou.

- 19** En in dié dae was daar geen koning in Israëel nie. En 'n Levitiese man het as vreemdeling vertoef agter in die gebergte van Efraim; en hy het vir hom 'n vrou, 'n byvrou, geneem uit Betlehem-Juda.
- 2 Maar sy byvrou het by hom gehoereer en van hom weggegaan na haar vader se huis, na Betlehem-Juda; en sy was daar vier maande lank.
- 3 Daarop maak haar man klaar en gaan haar agterna om na haar hart te spreek en haar terug te bring; sy dienaar was by hom met 'n paar esels. En toe sy hom in die huis van haar vader bring en die vader van die jong vrou hom sien, was hy bly om hom te ontmoet.
- 4 En sy skoonvader, die vader van die jong vrou, het hom teruggehou, sodat hy drie dae by hom gebly het; en hulle het geëet en gedrink en die nag daar oorgebly.
- 5 Maar terwyl hulle op die vierde dag vroeg in die môre opstaan en hy klaarmaak om weg te gaan, sê die vader van die jong vrou vir sy skoonseun: Versterk jou hart met 'n stukkie brood, en daarna kan julle weggaan.
- 6 En hulle het gebly, en hulle twee het saam geëet en gedrink. Daarop sê die vader van die jong vrou aan die man: Bly tog asseblief die nag oor, en laat jou hart vrolik wees.

- 7 Toe die man egter klaarmaak om weg te gaan, het sy skoonvader by hom aangedring, sodat hy weer die nag daar oorgebly het.
- 8 Terwyl hy op die vyfde dag vroeg in die môre klaarmaak om weg te gaan, sê die vader van die jong vrou: Versterk jou hart tog, en vertoef julle tot agtermiddag. En hulle twee het geëet.
- 9 Maar toe die man klaarmaak om weg te gaan, hy en sy byvrou en sy dienaar, sê sy skoonvader, die vader van die jong vrou, vir hom: Kyk, die son sak, dit wil aand word; bly julle maar die nag oor: kyk, dit is al laat, bly die nag hier oor, en laat jou hart vrolik wees; dan kan julle môre vroeg klaarmaak vir julle reis en na jou tente toe gaan.
- 10 Maar die man wou nie die nag oorbly nie en het klaargemaak en weggetrek en gekom tot teenoor Jebus—dit is Jerusalem—met ‘n paar opgesaalde esels by hom; ook sy byvrou was by hom.
- 11 En toe hulle by Jebus kom en die son al baie gesak het, sê die dienaar aan sy heer: Kom tog, laat ons uitdraai na hierdie stad van die Jebusiete en daarin vernag.
- 12 Maar sy heer sê aan hom: Ons kan nie uitdraai na ‘n vreemde stad waar nie van die kinders van Israhel is nie, maar ons moet verbytrek tot by Gíbea.
- 13 Verder sê hy aan sy dienaar: Trek, laat ons nader kom by een van die plekke en in Gíbea of Rama vernag.
- 14 So het hulle dan verder verbygetrek; en die son het vir hulle ondergegaan by Gíbea wat aan Benjamin behoort.
- 15 Toe draai hulle daar uit om in Gíbea te gaan vernag. En hy het ingekom en gebly op die plein van die stad, want daar was niemand wat hulle in sy huis opgeneem het om te vernag nie.
- 16 Maar kyk, in die aand kom daar ‘n ou man uit die veld van sy werk af, en die man was van die gebergte van Efraim afkomstig en het in Gíbea as vreemdeling vertoef; maar die manne van die plek was Beniaminiete.
- 17 En toe hy sy oë opslaan, sien hy die reisiger op die plein van die stad, en die ou man vra: Waar gaan u heen, en waar kom u vandaan?
- 18 En hy sê vir hom: Ons trek deur van Betlehem-Juda tot agter in die gebergte van Efraim; ek kom daarvandaan en het tot by Betlehem-Juda gereis, en ek gaan na die huis van IEUE; maar hier is niemand wat my in sy huis opneem nie,
- 19 alhoewel ons esels strooi sowel as voer het, en daar ook brood en wyn is vir myself en vir u dienaars en vir die bediende wat by u dienaars is; daar is aan geen ding gebrek nie.
- 20 Toe sê die ou man: Vrede vir jou! alleenlik, al wat u kortkom, is vir my rekening; u moet net nie op die plein vernag nie.
- 21 Daarop het hy hom in sy huis ingebring en aan die esels voer gegee; en nadat hulle hul voete gewas het, het hulle geëet en gedrink.
- 22 Terwyl hulle hul hart vrolik maak, omsingel die manne van die stad, slegte manne, meteens die huis en klop hard aan die deur; en hulle spreek met die ou man, die eienaar

van die huis, en sê: Bring die man uit wat in jou huis ingekom het, dat ons hom kan beken.

- 23 Daarop gaan die man, die eienaar van die huis, uit na hulle en sê aan hulle: Nee, my broers, moet tog nie kwaad doen nie, aangesien hierdie man in my huis ingekom het; moet nie hierdie skanddaad begaan nie.
- 24 Hier is my dogter wat ‘n jongmeisie is, en sy byvrou; laat ek hulle uitbring, onteer hulle dan en maak met hulle wat goed is in julle oë, maar aan hierdie man mag julle so ‘n skanddaad nie begaan nie.
- 25 Toe die manne nie na hom wou luister nie, gryp die man sy byvrou en bring haar uit na hulle daarbuite; en hulle het haar beken en die hele nag deur haar mishandel, tot die môre toe, en haar laat loop toe die rooidag uitkom.
- 26 En teen dagbreek het die vrou gekom en neergeval voor die ingang van die man se huis waar haar heer was, totdat dit lig was.
- 27 En toe haar heer die môre opstaan en die huisdeure oopmaak en uitgaan om sy reis voort te sit—kyk, daar lê die vrou, sy byvrou, voor die ingang van die huis met haar hande op die drumpel.
- 28 En hy sê vir haar: Staan op en laat ons trek; maar niemand antwoord nie. Daarop het hy haar op die esel gelaai, en die man het klaargemaak en na sy woonplek getrek.
- 29 Maar toe hy in sy huis kom, het hy ‘n mes geneem en sy byvrou gegryp en haar stukkend gesny volgens haar gebeente in twaalf stukke en dit in die hele grondgebied van Israhel rondgestuur.
- 30 En elkeen wat dit sien, het gesê: So iets het nie gebeur en is nie gesien van die dag af dat die kinders van Israhel uit Egipteland opgetrek het tot vandag toe nie; neem dit tog ter harte, gee raad en spreek!

Die Oorlog teen Benjamin.

20

- Toe het al die kinders van Israhel uitgetrek, en die vergadering het soos een man, van Dan tot Berséba, saam met die land Gílead, byeengekom by IEUE in Mispá;
- 2 en die hoofde van die hele volk, van al die stamme van Israhel, het in die vergadering van die volk van Aleim gaan staan—vier honderd duisend man te voet wat die swaard uittrek.
- 3 En die kinders van Benjamin het gehoor dat die kinders van Israhel opgetrek het na Mispá. Toe sê die kinders van Israhel: Vertel julle hoe hierdie misdaad gepleeg is.
- 4 Daarop antwoord die Levitiese man, die man van die vermoorde vrou, en sê: Ek het in Gíbea wat aan Benjamin behoort, gekom, ek en my byvrou, om te vernag.
- 5 En die burgers van Gíbea het teen my opgestaan en in vyandskap teen my die huis omsingel in die nag; hulle het gemeen om my dood te maak, en my byvrou het hulle onteer, sodat sy gesterf het.
- 6 Toe het ek my byvrou gegryp en haar in stukke verdeel en haar rondgestuur in die hele gebied van die erfdeel van Israhel, omdat hulle ‘n gruwel en ‘n skanddaad in Israhel begaan het.

- 7 Hier is julle, kinders van Israhel, nou almal: gee julle hier woord en raad!
- 8 Toe staan die hele volk op soos een man en sê: Geeneen van ons sal na sy tent toe gaan en geeneen van ons wegdraai na sy huis toe nie;
- 9 maar dit is nou die ding wat ons Gíbea sal aandoen: Op teen hom volgens die lot!
- 10 Ons sal naamlik tien man neem uit elke honderd van al die stamme van Israhel, en honderd uit duisend, en duisend uit tien duisend, om padkos vir die manskappe te gaan haal, om as hulle gekom het, met Gíbea-Beniamin te handel volgens die skanddaad wat hy in Israhel begaan het.
- 11 Toe versamel al die manne van Israhel by die stad, soos een man saamverbonde.
- 12 En die stamme van Israhel stuur manne deur die hele stam van Benjamin om te sê: Wat vir 'n misdaad is dit wat onder julle gepleeg is?
- 13 Lewer dan nou die slegte manne uit wat in Gíbea is, dat ons hulle om die lewe kan bring en die kwaad uit Israhel kan uitroei. Die Benjaminiete wou egter nie na hulle broers, die kinders van Israhel, luister nie;
- 14 maar die kinders van Benjamin het bymekaargekom uit die stede na Gíbea toe, om na die oorlog uit te trek teen die kinders van Israhel.
- 15 En die kinders van Benjamin uit die stede is op dié dag getel ses en twintig duisend man wat die swaard uittrek, behalwe die inwoners van Gíbea wat getel is: sewe honderd uitgesoekte manne.
- 16 Uit al hierdie manskappe was daar sewe honderd uitgesoekte manne wat links was; hulle almal het met 'n klip op 'n haar geslinger sonder om te mis.
- 17 En die manne van Israhel, behalwe Benjamin, is getel: vier honderd duisend man wat die swaard uittrek, hulle almal was krygsmanne.
- 18 En hulle het klaargemaak en opgetrek na Bet-el en Aleim geraadpleeg; en die kinders van Israhel het gesê: Wie van ons moet eerste optrek om te veg teen die kinders van Benjamin? Toe sê IEUE: Juda eerste.
- 19 Daarop het die kinders van Israhel die môre klaargemaak en laer opgeslaan teen Gíbea.
- 20 En die manne van Israhel het uitgetrek om te veg teen Benjamin, en die manne van Israhel het hulleself in slagorde teen hulle opgestel, na Gíbea toe.
- 21 Toe trek die kinders van Benjamin uit Gíbea uit, en hulle het op dié dag in Israhel twee en twintig duisend man teen die grond vernietig.
- 22 Maar die manskappe, die manne van Israhel, het hulle sterk gehou en hulle weer in slagorde opgestel op die plek waar hulle hul die vorige dag opgestel het.
- 23 En die kinders van Israhel het opgetrek en geween voor die aangesig van IEUE tot die aand toe en IEUE geraadpleeg en gesê: Moet ek weer nader trek om te veg teen die kinders van Benjamin, my broer? En IEUE sê: Trek teen hom op!
- 24 En toe die kinders van Israhel die tweede dag nader kom na die kinders van Benjamin,
- 25 het Benjamin uit Gíbea op die tweede dag uitgetrek om hulle te ontmoet en van die kinders van Israhel nog agttien duisend man wat almal die swaard uittrek, teen die grond vernietig.
- 26 Daarop trek al die kinders van Israhel, ja, die hele volk weg, en hulle het na Bet-el gekom; en hulle het geween en daar gebly voor die aangesig van IEUE en dié dag gevas tot die aand toe en brandoffers en dankoffers voor die aangesig van IEUE gebring.
- 27 En die kinders van Israhel het IEUE geraadpleeg—want die verbondsark van Aleim was in dié dae daar,
- 28 en Pínehas, die seun van Eleásar, die seun van Aäron, het in dié dae voor Hom gedien—en gesê: Moet ek nog weer uittrek om teen die kinders van Benjamin, my broer, te veg, of moet ek ophou? Toe sê IEUE: Trek op, want môre sal Ek hom in jou hand gee.
- 29 En Israhel het rondom teen Gíbea hinderlae opgestel.
- 30 En die kinders van Israhel het op die derde dag teen die kinders van Benjamin opgetrek en hulle teen Gíbea opgestel soos die vorige kere.
- 31 En die kinders van Benjamin het uitgetrek, die manskappe tegemoet—hulle is van die stad afgesny—en, soos die vorige kere, het hulle begin om sommige van die manskappe op die grootpaai te verslaan, waarvan die een opgaan na Bet-el, en die ander deur die veld na Gíbea—omtrent dertig man in Israhel.
- 32 Toe dink die kinders van Benjamin: Hulle is voor ons verslaan soos die eerste keer! Maar die kinders van Israhel het gesê: Laat ons vlug en hom van die stad afsny na die grootpaai toe.
- 33 En al die manne van Israhel het hulle stelling verlaat en hulle by Baäl-Tamar opgestel, terwyl die hinderlaag van Israhel aanruk uit sy stelling, uit die oop plek by Geba.
- 34 En tien duisend uitgesoekte manne uit die hele Israhel het teenoor Gíbea vandaan gekom, en die geveg was hewig; maar Benjamin het nie gemerk dat die onheil hulle sou tref nie.
- 35 Toe het IEUE Benjamin voor Israhel verslaan, en die kinders van Israhel het op dié dag in Benjamin vyf en twintig duisend een honderd man wat almal die swaard uittrek, vernietig.
- 36 So het dan die kinders van Benjamin gesien dat hulle verslaan is. En die manne van Israhel het aan Benjamin terrein gegee, omdat hulle vertrou het op die hinderlaag wat hulle teen Gíbea opgestel het.
- 37 Toe het die hinderlaag vinnig na Gíbea gestorm—en die hinderlaag het getrek en die hele stad met die skerpte van die swaard verslaan.
- 38 En die manne van Israhel het 'n afspraak met die hinderlaag gehad dat hulle 'n groot rookwolk uit die stad moet laat optrek.
- 39 Daarom het die manne van Israhel omgedraai in die geveg; en die Benjaminiete het begin om onder die manne van Israhel sommige neer te slaan, omtrent dertig man, want hulle het gedink: Hy is regtig heeltemal voor ons verslaan soos in die vorige geveg.

- 40 Intussen het die wolk begin optrek uit die stad, ‘n rookpilaar; en toe Benjamin agter hom omkyk, trek die hele stad al in rook na die hemel op!
- 41 Toe die manne van Israhel dan nou omdraai, het die manne van Benjamin geskrik, want hulle het gesien dat die onheil hulle gaan tref;
- 42 en hulle het voor die manne van Israhel omgedraai op pad na die woestyn; maar die geveg het hulle ingehaal, terwyl die wat uit die stede kom, hulle daar tussenin vernietig:
- 43 hulle het Benjamin omsingel, hom agtervolg, hom op die rusplek vertrap tot teenoor Gibeá, aan die oostekant.
- 44 En daar het van Benjamin agttien duisend man geval, en dit almal dapper manne.
- 45 Toe spring hulle om en vlug na die woestyn, na die rots Rimmon; maar hulle het in die nageveg op die grootpaaie vyf duisend man van hulle gedood en hulle agternagesit tot by Gideom en twee duisend man van hulle verslaan.
- 46 En al die gesneuweldes van Benjamin op dié dag was vyf en twintig duisend man wat die swaard uittrek, en dit almal dapper manne.
- 47 Maar ses honderd man het omgedraai en gevlug na die woestyn, na die rots Rimmon en vier maande by die rots Rimmon gebly.
- 48 Toe gaan die manne van Israhel terug na die kinders van Benjamin en verslaan hulle met die skerpte van die swaard, sowel mense as diere en alles wat voorgekom het; ook al die stede wat hulle aangetref het, het hulle aan die brand gestee.

Vrouens vir die Beniamiete.

- 21** Maar die manne van Israhel het al in Mispa gesweer en gesê: Niemand van ons mag sy dogter aan ‘n Beniaminië as vrou gee nie.
- 2 En toe die manskappe in Bet-el kom, het hulle daar gebly tot die aand toe voor die aangesig van Aleim en hulle stem verhef en geweën met ‘n groot geweën
- 3 en gesê: Waarom, o IEUE, Aleim van Israhel, het dit in Israhel gebeur dat daar vandag een stam uit Israhel vermis word?
- 4 Daarop het die manskappe die volgende dag vroeg klaargemaak en daar ‘n altaar gebou en brandoffers en dankoffers gebring.
- 5 En die kinders van Israhel het gesê: Wie is daar van al die stamme van Israhel wat nie opgegaan het na die vergadering, na IEUE toe nie? Want daar was ‘n plegtige eed teen die een wat nie opgaan na IEUE in Mispa nie—hy moet sekerlik gedood word.
- 6 Toe het die kinders van Israhel hulle broer Benjamin jammer gekry en gesê: Daar is vandag een stam uit Israhel afgesny.
- 7 Wat kan ons doen vir hulle wat oorgebly het, wat vroue aanbetref? Want ons het by IEUE gesweer dat ons nie van ons dogters aan hulle as vroue sal gee nie.
- 8 Toe sê hulle: Wie is diegene wat van die stamme van Israhel nie opgegaan het na IEUE in Mispa nie? En kyk, niemand het uit Jabes in Gilead na die laer, na die vergadering gekom nie.

- 9 En die volk is getel, en daar was niemand van die inwoners van Jabes in Gilead nie.
- 10 Toe stuur die vergadering daarheen twaalf duisend man uit die dapper manne en gee hulle bevel en sê: Gaan heen en slaan die inwoners van Jabes in Gilead met die skerpte van die swaard, ook die vroue en die kinders.
- 11 En dit is die ding wat julle moet doen: Alles wat manlik is, en al die vroue wat die gemeenskap met die man ken, moet julle met die banvloek tref.
- 12 En hulle het onder die inwoners van Jabes in Gilead vier honderd meisies aangetref, jongmeisies wat geen gemeenskap met ‘n man gehad het nie, en dié het hulle na die laer gebring in Silo wat in die land Kanaän lê.
- 13 Toe stuur die hele vergadering en hulle spreek met die kinders van Benjamin wat by die rots Rimmon was, en bied hulle die vrede aan.
- 14 Daarop het Benjamin in dié tyd teruggekom; en hulle het die vroue wat hulle uit die vroue van Jabes in Gilead in die lewe behou het, aan hulle gegee, maar só was daar vir hulle nie genoeg nie.
- 15 En die volk het Benjamin jammer gekry, omdat IEUE ‘n skeuring gemaak het onder die stamme van Israhel.
- 16 Toe sê die oudstes van die vergadering: Wat kan ons doen vir die wat oorgebly het, wat vroue aanbetref? Want die vroue was uit Benjamin verdelg.
- 17 Verder sê hulle: Die besitting van die wat oorgebly het, behoort aan Benjamin, sodat geen stam uit Israhel mag uitgedelg word nie.
- 18 Maar ons self kan hulle geen vroue uit ons dogters gee nie; want die kinders van Israhel het gesweer en gesê: Vervloek is hy wat ‘n vrou aan Benjamin gee.
- 19 Toe sê hulle: Kyk, daar is jaar vir jaar ‘n fees van IEUE in Silo wat noord van Bet-el lê, oostelik van die grootpad wat opgaan van Bet-el na Sigem, en suid van Lebóna.
- 20 En hulle het die kinders van Benjamin bevel gegee en gesê: Gaan en lê en loer in die wingerde.
- 21 En let op, en kyk, as die dogters van Silo uittrek om hulle koordanse uit te voer, dan moet julle uit die wingerde uitkom, en julle moet vir julle, elkeen sy vrou, uit die dogters van Silo vang en na die land Benjamin gaan.
- 22 En as hulle vaders of hulle broers kom om by ons ‘n saak te maak, sal ons vir hulle sê: Skenk hulle aan ons, want ons het nie vir elkeen ‘n vrou in die oorlog geneem nie. Julle self het hulle mos nie aan hulle gegee nie; in dié geval alleen sou julle skuldig gewees het.
- 23 Die kinders van Benjamin het toe so gedoen: hulle het vroue volgens hulle getal weggedra uit die danseresse wat hulle geroof het; en hulle het weggegaan en teruggekeer na hul erfdeel toe, en hulle het die stede opgebou en daarin gewoon.
- 24 En die kinders van Israhel het in daardie tyd daarvandaan weggegaan, elkeen na sy stam en na sy geslag, en hulle het daarvandaan uitgetrek, elkeen na sy erfdeel toe.
- 25 In dié dae was daar geen koning in Israhel nie: elkeen het gedoen wat reg was in sy oë.